

# MMUNYÌ MÛNDÌ

## MWÀ KUCÌMUNA?



Twinyikàayi mitù yètù bwà disambila.

Taatù wetù, tudi tuKusàkidila, mu dindà emu, bwà cikondo eci cyà butùmbi cyà kудisanga cyàkàbìdì, ne kukangula Diyì dyà Mukalenge, kuDyàdija mwaba ewu kumpàla kwètù. Nènku—nènku ne disambila mpindyewu, bwà Nyumà Mwímpè àngatè cìdì Nzambì aci, ne àtùpèèshèCi, bwà twamònakù mwà kuumuka mwaba ewu wà dikuukwila leelù ewu ne myoyi yà disànka myùle tètè ne disànka. Pa kumòna bukolè Bwèbè bunène bwà disùngila, Mukalenge, mùdìbu busùngila bapika ne bubàpèèsha budìshikaminyi, bütùmanyisha “bintu byàkadiku, ne bidìku, ne byàlwà.” Nènku tudi ànu tuKusàkidila bwà bintu ebi.

<sup>2</sup> Tudi tulòmba bwà Ûtùbènèshèku patùdì tulonga Dìyi Dyèbè pàmwè mpindyewu apa. Nènku patùdì tuumuka, twambèku mu myoyi yètù, patùdì twenda tuya apu ne: “Myoyi yètù yìvwa yilákuka kapyà munda mwètù pàvwà Ye, Nyumà Mwímpè, ùyiikila neetù patùvwà mu njila apu.”

<sup>3</sup> Bèneshàku mwambi yònsò leelù ewu, mwaba ònsò, basadidi Bèèbè bàdì biimànyine Bulelèlè Bwèbè, ebu. Andàmùnàku masambila àbò bwà babèèdì. Ondòpàku mibidi yà babèèdì yà aba bàdì bàsaamà.

<sup>4</sup> Mukalenge, tudi baswè kulòmba bwà Wèwè kupàtuka munkaci mwà bantu bwà kwenda kukèbulula dimiinu didyànjila kulongolola didì pambèlù pààpa adi, Mukalenge, ne kulwa naadi, mu mùshindù kampànda, bwà Bukènkè bwàkenkesha mu kajila aku, Mukalenge. Bwalu, tudi twitabuuja ne dìbà dikaadi dyènda dipita, dìbà didì dyènda dìbwela lùkàsa ku wesètè, pashiishe nekwikalè dyàkàmwè cyà ne “kawkàkwikala kàbìdì dìbà to.” Cìkondo ne Cyendèlèlèlè nebinwanganè pàmwè pàdì Nzambì ne cisàmbà Cyendè bìnwàngana pàmwè. Nènku tudi tulòmba, Nzambì, ne, pa dìbà adi, twamònakù mwà kubadiibwa munkaci mwà aba bàànwànganà mu Kilistò abu, bàdì bàbìikidiibwa ne m’Mukàji-musèla Wendè abu.

Tùkwàcìshèku, leelù ewu, patùdì tudìlongolola apa, katùyì bamanyè cìikalà mààlabà mwà kulama to, kàdì tudi pabwìpì ne kwakidila cintu kanà cyònsò, Mukalenge, bwà ku dyètù pèètù dimanya, cyŪdì naaci bwètù aci. Tudi badìlongolola bwà kucyàkidila. Tudi tulòmba dibènesha edi bwà butùmbi bwà Nzambì, mu Dìna dyà Yesù Kilistò. Amen.

Nudi mwà kusòmbaayi.

<sup>5</sup> Ncyà bushùwà ne mvwa ne disànkà, mu dindà emu, pângààbwèdi ne kumòna ne—ne bantu mbadisange pàmwe bwà mudimu wà Mukalenge. Nènku tudi tufila dimanyisha mpindyewu bwà dilòòlò edi. Nekwikalè mudimu wà dyondopa dilòòlò edi. Netúsambidilè babèedi, dilòòlò edi. Kwènji ànu katanci kakesè cyanaànà, bàdi. . .

<sup>6</sup> Pângààbwèdi apu, Billy, mwanàànyì wa balùme, kungambilaye, wàmba ne: “Kùdi mu—muntu mukàlàngà kaaba aka, udi ànu muntu mupèlè udi mwendèshe màshinyì mufùmìne ntàntà mule.” Ki yèyè ne: “Ndi—ndi mumutèèke mu cibambalu amu, Papa.”

<sup>7</sup> Ndi—ndi mulwè pashiishe makèèlèlè dilòòlò awu, ne—ne ncivwa mupetè mwà kulonga byàbúngì pa cyena-bwalu cyà kàlaasà kàà Dyàlumingu bwà bímvwà njinga kwakwilapu, mu dindà emu abi to. Nànku ke mèmè kwambula ndambù wa tuntu tufùnda tùmvwà mwangàcile ku bímvwà muumvwe mwanèètù kampànda wàmba, ne kwangacilakù cyena-bwalu kampànda, bwà kwenza bu mupetèlekù dileesònà dyà kàlaasà kàà Dyàlumingu mu dindà emu; ne patùdi tulongolola apa, ne tudìlongolola bwà disangisha dyà dilòòlò.

<sup>8</sup> Ke Billy kwamba ne: “Kùdi muntu munda amu udi usaama.” Yèyè ne: “Ndi—ndi—ndi njinga bwà wèwè kupìcilakù kamumòna.” Pa nànku, mèmè kubwela mu cibambalu amu ànu mpindyewu ewu. Nènku mwanèètù wa balùme kampànda wa bukolè bwànyì ebu, ne mukàjèndè, basòmbe muntwamu. Nènku ki Nyumà Mwímpè kutùluka munkaci mwètù mu cibambalu mpindyewu mene.

<sup>9</sup> Anji elààyibi meeji, ànu ku ditèèlè dyà masangisha à dyondopa, kàdi’s ki Yèyè awu. Nwamònu anyì? Ke Yèyè kwambila mwanèètù wa balùme ewu byònsò byàkadiye mwenze, ne bìvwaye munkaci mwà kwenza, ne civwà cìmutwàdile lutàtù, ne kùvwaye mufùmìne, ne byònsò bìvwà bimutàngile. Nènku kùvwa mundìdimbi munène wà mîdimà mulembelela mu cibambalu amu. Pashiishe kubangakù kwenda kùtòòka, kwenda kùtòòka, kwenda kùtòòka, ànu kutòòka, pashiishe Nyumà Mwímpè kudyàngacila cyalu.

<sup>10</sup> Mpindyewu, ngèèla meeji ne muntu awu ùdi mu... mwaba kampànda paanyimà apa patùdi twakula apa. Yèyè ne mukàjèndè pàmwàpa kabèèna mwà kubwela mu nzùbu emu to, kàdi mbambe ne nebiikale mwà kushààla, nànsha bishi, bwà masangisha awu. Mbafùmìne ku nseke yà kuulu eku, pabwìpi ne Yakima, ku Washington, ne bèndèshe màshinyì bàfikè. Ne yèyè mmwambi wa Èvànjeeliyò.

Kàdi ànu pa kumòna ngàsà wa—wa Nzambi kuntwaku’s! Kwinè aku, muntu awu’s ùkaavwa mu cyondapelu aci ne bàmondapa ne bikwàbò byònsò. Nyumà Mwímpè munkaci mwà kubuulula byònsò ebi. Pààbi’s, bangàngàbukà bàteeta ne mwabu

mwônsò bwà kwenza cyônsò civwàbo bafwànyine kwenza aci, pàmwàpa, bwà muntu awu, kàdi cyàkakèngela ànu dilenga kampànda dikesè dyà kùdi Nzambi, bwà kukùdimuna myanda. Lwondapu lwà bikùmà byà ku nzembu lùdi ànu lwimpè, kàdi bìdi ànu bu mutùdi bafwànyine kubìikila ne “kubaabacila,” nudi bamanyè’s. Wèwè, mbifwànyine kukufikisha ku didyùmvwà bibì bitàmbe, nwamònu’s, bwalu udi mufwànyine kupwà mwoyi byônsò byûkaadiku mumanyè abi, pàdibo bèèla bwanga abu munda mwèbè apu. Kàdi Mukalenge Nzambi, mùshindù mwinè wùdi ngàsà ne luse Lwèndè’s wè! Ne kumpàlà mene kwà mèmè kulambulakù mwàkù wà disambila bwèndè yéyè, dikaavwa dimanè kujika. Nwamònu anyi? Byàkakèngela ànu cintu kampànda cyà Nzambi aci, dilenga kampànda adi, bwà kucyènza.

Kabivwa bikèngela bwà mèmè kwamba eci to. Èyowà. Mwva mufwànyine kutàngila, kumòna muntu awu mpindyewu. Èè, ncivwa mumanyè ní uvwa mufwànyine kulwa leelù, anyi to.

<sup>11</sup> Mu ditùnga dîmvwà musòmbèle amu, lumingu elu. Ndi—ndi—ndi munange balundà bàanyi kuntu kwaka. Nkaadiikisha kakesè kumpàlà kwà masangisha manène aa, nudi numòna’s. Ki mèmè kwalukila kumbèlu, bwà kuya kuntwaku bwà kuya kalemba nshindì ne bânà bèètù aba. Nènku dîkù edi, mèkù aa, èyowa’s, àmvwà mushàale naawu kuntwaku awu, mbantu balenga bushùwà. Kàdi muntu ewu, mwanèètù mulelèlà, balundà; ke cidibu.

Nènku umwe wa kùdibo mmunangi munène wa—wa dilemba ne mbwa. Ne udi naayi cikùmbi cijimà kuntwaku. Nènku—nènku mèmè kumòna mbwa mutàmbe bwimpè kuntwaku, kantu kakesè, kààbwena kantù mbiikila ne bu: “kashawùke bu cyàbìbìdi cyà mbwa ne katwe eku ne eku bu mbwa yìbìdi,” nudi bamanyè’s, uvwa unyeemakana ùnyùngulukila ku nzùbu aku. Ki mèmè kudyàmbidila ne: “Ekèlekèle, Joe kàvwakù mufwànyine kujinga kwikala ne cintu bu nànkù to!”

<sup>12</sup> Nènku, mu bushùwà bwà bwalu, lwà mu Arizona mwàmwa, kènà ne civwàye mwà kwenza nendè to. Úvwa mwà kubwela mu ntùlu ya mèbà amu, nènku bwèndè bùvwa bufwanyine kutùuka. Ki dìbà adi mèmè kwamba, mèmè pàanyi ne: “Kanwèna mwà kwikala nendè to. Kabàtu bàkwàta mudimu ne mbwa muntwamu to, mu citùpà cyà buloba aci. Bwalu, bwóbò, èè, kabàvwa ànu mwà kukwàta naayi mudimu to. Bàvwa bafwànyine. . .kàbìdi, kuulu, ngii—ngiikàdìlù wa ditùnga ne ntùlu yà mèbà ayi, nènku yìvwa mwà kushipiibwa.” Ne pashìshe, bulelèlà, mbwa kuntwaku, m—mbwa wa diitu, anyi cintu kampànda ncifwànyine kumushebeya, pàmwàpa, nànsha bìshi, bu yéyè mwà kupàtuka.

<sup>13</sup> Ki dìbà adi muntu awu kungambilayè ne: “Udi ànu mwà kumwangata.” Kàdi mèmè—mèmè ncivwa mwà kumwangata to.

Ntu—ntu mmwanyisha. Mêmè kulwa kujandula ne, ùvwa umwe wa ku mbwa yèndè minanga.

<sup>14</sup> Nènku mulùme ewu ùdi ne mukàjì mukesè mulenga kwìsù ne bânà bakesè. Nènku ditùkù adi, kubangayè kupàtuka ne kàshinyì kèndè cyànyimà, nènku ùvwa ne kàshinyì kàà Oldsmobile aka. Ne kabwà kakesè aka kàdi ànu bu bule *nùnku*, ànu kânà kakesè. Nènku kukàdyatayè. Kaa Oldsmobile aku kadyate kabwà kakesè aku, lwà paanyimà *apa*, ne kukàbòza, mwaba ùvwa mabwe à mu njila wa nkàta awu kufinakaja ànu kaacifù kààkù kakesè aku lwà mwinshì emu, nudi bamanyè's. Nènku—nènku mukàjì mukesè awu, pamutù pàà kunyeemenayè ne kabwà kakesè aku kwà ngàngàbukà wa nyama . . . Mu bushùwà bwà bwalu, ngàngàbukà wa nyama ewu ùvwa mufwànyìne ànu kukàlàadika tulù dībà adi mene, ne kukàshebeya. Nwamònu anyi?

Kùvwa mukwàbò nsongàalùme naanyì. Nènku mmwenze ànu ufika kuntwaku, kwambaye ne: “Wàwa wìkala ne mbwa wanyi, nùnku's ndi mumwasè ku cingoma.” Yèyè ne: “Kwàjiki. Kàdi kumulekela ùkènga mùshindù awu anyi?”

<sup>15</sup> Mêmè ne: “Èè, katumwashi ku cingoma to.” Mêmè ne: “Twànjàayibi kwindila kakesè.”

Mêmè kushiya bantu bwònsò ku lusekè, kàdi kuya kukàsambidila. Kabwà kakesè aku kundondaku too ne mu lutanda amu. Nènku yèyè, èyowà, yèyè . . . Nwamònu anyi? “Bintu byònsò byùdi ujinga, paùdi usambila, itàbùùja ne udi ubipeta; neùbipete, nebàkupèèshebi.” “Bintu kanà byònsò.” Ki wetù Mukalenge Nzambi nyàwù, kí mmwòmò anyi? Yèyè ùdi—Yèyè ùdi mulenga wa dikèmà ne mukèmeshanganyi. Ne ncyà bushùwà ne tudi baMunangè, mu dindà emu; ne baMwindile ne mwoyi wùzùka, ne bamanyè . . .

<sup>16</sup> Kumòna, ditùkù adi, n—babàka kampànda bakùlàkàje, tatwèndè ne mamwèndè wa cidimba cìmpè cyà dikèmà cyà disangisha dyà beena kwitabuuja edi—edi. Nènku maamù awu ùdi, kaa, ngèèla meeji ne ùkaadi wìpacila ku mvùla lukàmà, ne papa awu, pèndè's. Nènku kùkaadi bidimu bitwè ku dikumi ne bibidì muntu ewu kàtùkù munyunge to; kacya wàdilàadila paanyimà, ànu mushàale mudyolòle. Anyi, kèna mwà kulàadila mu luseke lwèndè emu to, anyi cintu nànsha cìmwè. Mulàadika mwaba awu munda mwà bidimu dikùmi ne bibidì. Mwikàle ànu mununu. Ne maamù ùdi mpindyewu wìpacila bidimu byèndè abi, ngèèla meeji, mwaba kampànda pabwìpì ne bidimu lukàmà, ne mukwàcikwetù mwenze ne luse awu ùdi ànu wàmba kujìmija lungenyi lwèndè lwà buntu. Ùdi munkaci mwà kwela meeji ne muntu kampànda ùdi munkaci mwà kumunyènga byònsò bidiyè naabì abi.

Ki mêmè kutàngila ku . . . dyàmwàmwà dyà mèèsà, twètù bwònsò, bansongà ne bakùlàkàji, bàvwà basòmbe mwaba awu

abu. Ki mêmè ne: “Tuyàaya penyi? Citùdì twenza ncinyi?” Nènku inábànzá ùmvwà nshààla musòmbè nendè awu dībà adi awu, ùvwa mmamwëndè ne tatwëndè. Ki mêmè ne: “Wèwè pèèbè, udi uyàaya mutàngile kwòkò aku. Menemene’s, muntu ne muntu wa kutùdì.” Nwamònu anyi?

<sup>17</sup> Anji elàànganaayikù ànu meeji pa bwalu abu, katanci kakesè cyanààna, kumpàla kwà twètù kubanga dileesòna dyètù. Kwòkò aku nkunúyaaya batàngile’s. Cyùdì uditàcishila ncinyi? S’mbwà kwikala ne mwoyi. Udi ne mwoyi bwà cinyi? S’mbwà kufwà. Kí ncifwànyine kwikala citàmbe bukùtākàne bu twètù katùyi biitàbe bulongolodi bwà Nzambi bwà Mwoyi wà Cyendèlèlèlè anyi? Citùdì bafwànyine kwela meeji ncinyi? Ncinyi—ncinyi cìdì cifwànyine kwikala mu meeji ètù, cìdì cifwànyine kukòka ntèmà yètù ku . . .kuyitùma ku cintu kanà cyònsò? Ambàbi tǔng bu wèwè mupete miliyò yà ndola lukàmà, ne mwangàte ditùnga dyà—dyà Indiana edi, anyi ní nditùnga kanà kaayi dyònsò, anyi mene ditùnga dijimà edi, anyi, nànsha, buloba bujimà mene?

Ushààla ne mwoyi ntàntà mukùmbàne, nebikèngele bwà kufika ku cyòci aci, wèwè pèèbè. Nwamònu anyi? Nènku ku musangu ne ku musangu, ku ditùkù ne ku ditùkù, musangu wònsò wùdì mwoyi wèbè wùtuuta awu, wèwè’s uyàaya mutàngile buludì ku cyòci aci. Nwamònu anyi? Wèwè, kwenàku ne cyùdì mupetè to. Udi ku luseke lwà bàdì bapangile, ne, wèwè, bikèngela ùjimijè. Kàdi vùlukàayi mulayi awu, ne: “Ewu wajimija mwoyi wèndè bwà bwalu Bwànyi neàwùpetè.” Mpindyewu, ncinyi cikwàbò cìdì cifwànyine kwikala citàmbe bubanji bwà kupeta Mwoyi, nànsha wèwè mujandulè ne buloba bujimà mbwèbè wèwè? Kàdi, wèwè—wèwè mupetè Mwoyi, udi mupetè cintu citàmbe bunène cìdì cifwànyine kupeteka. Ndi muswè bwà . . .

<sup>18</sup> Mêmè kutàngila ku dyàbakàjì dyànyì e kumòna cyàkàbìdì, ànu mpindyewu ewu, cileeji cikwàbò cyà bucìmunyi cyà ngàsà wa Mukalenge. Kùkaadi ndambù wa mbingu, mvwa mubiikidìbwe ku telèfonè. Ne cidimba cilenga cyà èkèleeziyà ewu, anyi mubidi ewu. . . Ncìtu muswè kubiiikila eci bikolè ne ng’èkèleeziyà nànsha. Ntu—ntu muswè kubiiikila eci, ne. . .

Ànu bu mùmvwà ngàakula ne bàmwè bantu amu, kwambabò ne: “Èè, wèwè ewu udi wa mu èkèleeziyà kaayi’s?”

Mêmè ne: “Ncyèna wa mu . . .”

“Udi wa mu dǐngumba kaayi?”

Mêmè ne: “Nànsha dǐmwè.”

Yèyè ne: “Èè, wèwè udi wa mu cinyi?”

Mêmè ne: “Mu Bukalenge kampànda.”

<sup>19</sup> Bukalenge kampànda! “Ne ku Nyumà umwèpelè nkutùdì babàtǐjǐibwe mu Bukalenge abu.” Ku Nyumà umwèpelè,

bwônsò, mu Bukalenge ebu! Yesù wàkamba ne: “Sambilaayi ne: ‘Bukalenge Bwèbè bùlwe. Diswa Dyèbè dyènzekè pa buloba, bu mùdidi dyènzeka mu Dyulu.’” Mpindyewu, Yéyè wàkiimana dǐngà ditùkù kumpàlà kwà Mukùnà wà Dikùdimuka dyà mpàla, kwambaYè ne: “Bulelèlè Ndi n nwàmbila ne, bàmwè bàdi biimàne kaaba aka aba, kabààkulabula lufù to, too ne pààmònàbo Bukalenge bùlwa mu bukolè.” Cìvwa cidyànjlila kuleeja, bu mutùvwà bacilongè, Mukùnà wà Dikùdimuka dyà mpàla. Ne Bible mmwambe ne: “Bukalenge bwà Nzambi bùdi munda mwènù.” Nànku awu, aba ke bantu bàà Bukalenge bàdi bàjikula patòòke ne eci kí nkwàbò to. Panù kí nkwètù nànsha. Tudi bindile Dilwa dyà Mfùmù, bwà kutèeka Bukalenge.

<sup>20</sup> Bàvwa bambiikile mu bwalu bwà lukàsà, bwà mwa—mwanèètù kampànda mununu ùtu bwànyì mèmè bu taatù mundedi. Nènku yèyè. . . Ncìvwa mumumanyè ntàntà mule menemene to piine apu, kàdi ndi mvùluka ditùkù dǐngàakamubwejà kaaba aka bwà dibàtiiza dyà mu màyi. Nènku àbìdì àdi paanshì aa muntu awu neikalè ne bidimu makumi citèemà ne cimwè. Ki mukàjèndè munanga awu kumbiikilaye, ne bu mùvwàye mungàngà mukàji, kwambaye ne: “Mwoyi wèndè ùvwa mwimane ànu menemene.” Pa kuumusha aci, yèyè ùvwa ne. . . Kaa, ndi mbiikila. . . ncyèna mwà kuvùluka dǐnà to. Dìsaamà dyà mwoyi. [Mwanèètù wa bakàji kampànda ùdi wàmba ne: “Ditàcishiibwa dyà mijilu yà mwoyi.”—Muf.] Dìsaamà dyà ditàcishiibwa dyà mijilu yà mwoyi. Twasàkidila. Dìsaamà dyà ditàcishiibwa dyà mijilu yà mwoyi, ne mwoyi mwimàne ànu menemene. Ngàngàbukà nànsha kumupàku ditèkemena, nànsha dyà kànà to. Nènku muntu awu ùvwa ùpùnga ne lufù, ki kumbiikidishayè.

<sup>21</sup> Ki mèmè kubwela mu kàshinyì kànyì kakesè kàà kale kàà Ford aku, ne kwasa lwendu mutàngìle ku Ohio, ne mwànyì mwônsò, kàdi ncìyi mumanyè to, lùmwe lwà ku nkàtá yànyì lùvwa lusendàme, ke kudyà kushèèkelesha ndundu’s. Ki nànku awu, mèmè munkaci mwà kuya kuntwaku, mu dipatuka dyà dyelesha dyà kàsòloonyi, bu pa dǐbà dikumi ne dǐmwè jaajaaja nànku awu, mèmè kubanga kudìtacisha mu meeji bwà bwalu bwèndè, ntu—ntu mumunange. Ne ndi mumanyè ne, bu—bu byòbì bitùngùnùke, bu Mukalenge mwà kunènga, mòna’s, nànsha ku tootoo nànsha ku ndandanda, nebikengelè bwà twètù kushiyangana muntu ne mukwèndè.

<sup>22</sup> Kàdi, aci kacýàkupangisha Dyambwibwa, mpindyewu to. Nwamònu anyi? To. Bàdi bàlwa dyàmbedi, dǐbà adi. Bwòbò mbàà dyèsè, bàkàdi bayè abu. Bàdi bàlwa dyàmbedi. Nwamònu anyi? Nwamònu anyi? “Twètù bàdi ne mwoyi ne bashààle abu, too ne ku Dilwa dyà Mukalenge, katwàkupangisha anyì kupùmbisha aba bàdi balààle tulù to. Mpungi wa Nzambi neàdìlè; bafwè mu Kilistò nebàbiikè dyàmbedi. Pashìishe pàdi mèsù ètù àbandila bananga bèètù, dǐbà adi netùshintulukè, mu katanci kakesè,

mu mubùnyi wà dísi, nènku ne bwôbò netwàngaciibwè muulu pàmwè.” Nwamònu anyi? Aba bàdi badyanjilè kuya abu mbàà dyèsè kutàmba aba bàdi ne mwoyi.

<sup>23</sup> Ndi mwenze ànu mpàtuka mu cisumbidi cyà kàsòlonyi, ànu pa díbà dikumi ne umwe jaaaja, Nyumà Mwimpè kungambila ne: “Lekèlà kuditàcisha bwà bwalu bwèndè. Neùmubulè ku cyanza, mu mùsèsù mwàmwa kàbidi, ne yèyè neàlwe mu èkèleeziyà,” muntu wa bidimu makùmì citèemà ne cimwè, ùpunga ne lufù.

Pàngàakatwilanganà ne mukàjèndè ne bananga bèndè mu lùpitaadi ku Lima, kungambilabò bwà ngiikàdilù wèndè. Mémè kubwela, kumutàngila muntwamu. Kwambayè ne: “Kadi yèyè udi ne cintu kampànda cyà pabwàci.” Yèyè ne: “Yèyè—yèyè mmubanga kuumvwa bimpè, pa díbà dikumi ne umwe jaaaja.” Èè, nènku mvwa... Mukalenge ùkaavwa mulejè bantu abu bintu byàbúngì be, bàvwa bamanyè ne ncìvwa ànu mwambè nàнку bwà kwamba to. Bwalu, bàakangambila dyàmbedi ne: “Wàkabanga kushintuluka.” Bàvwa bamanyè ne mémè nembambilè bulelèlà.

<sup>24</sup> Pa nàнку, mu dyàlumingu dishààle, pàmvwà mbwela mu Cafétéria kàà Blue Boar mu Louisville, kùndi ngèèla meeji ne byà pa lukàmà makumi mwandamukùlù byà disangisha edi bìdi bidisangisha mu dyàlumingu mu mapingaja, bwà kudyà, nganyi ùmvwà mumòne ùpweka ne mùsèsù? Ndi nnwambila ne, mwoyi wànyi wàkazakala pàngàakamòna Mwanèètù Dauch wènda upweka ne mùsèsù, ànu menemene cìvwa Ye mungambile. Mémè kumulabula ku cyanza, mu—mu mùsèsù amu.

<sup>25</sup> Pashìshe mémè—mémè kwalukila kaaba aka bwà dyàlumingu dishààle edi dilòlò ne kwakula pa cyena-bwalu cyà bwobùmwè, cyà *Cimanyinu cya Didisanga Dyà Cikondo*. Pa nàнку... Ne pashìshe aci kufikisha aci ku dyenzeka, ànu cyàkambàYe. Kàdi's ki yèyè ewu musòmbe mu èkèleeziyà emu leelù ewu, ànu mwaba ewu ku luseke lwètù mene, bu civùlukilu cyà ngàsà wa Nzambi. Pàmvwà mmulabula ku cyanza mu ntentà amu, mu ntentà wa mbòmbonè mùvwàye ùsanganyibwa amu, mémè kwamba ne: “Mwanèètù Dauch, neùmvwè bimpè. Nénkumònè cyàkàbìdi mu èkèleeziyà. Aci, cidi ng'EMU MMÛDÌ MUKALENGE WÀMBA.” Nwamònu anyi? Ki yèyè ewu musòmbe mu èkèleeziyà, kaaba aka mene mpindyewu, Mwanèètù Dauch.

<sup>26</sup> Mémè ncìyi mutùpàkàne to, mwambi mwena bwalu bùmvwà ngàakula awu, kùkaadi katancì kakesè, Nyumà Mwimpè wàkabwela ne kubuulula bintu byònsò ebi; wàkamwambila mwàkenzekabi, ne kumwambila cyàkenzàye; mwàkenzekàci, mwàkafikàci, byònsò bìvwà munkaci mwà kwenzeka kubangila ànu díbà adi, too ne ku ngiikàdilù wa díkù dyèndè, ne byònsò pa bwalu abu. Ki mémè kumwambila, ne: “Kwàjiki.” Nènku

mwambi awu mmusòmbe ànu mwaba ewu, ku dyàbalùme eku. Udikù mwà kwela ànu cyaanza cyèbè muulu cyaààà anyi, mukalenge? Mwab'awu, yéyè ne mukàjèndè, menemene, ànu mpindyewu mene.

Ki Mwanèètù Dauch ewu musòmbe, kaaba aka mpindyewu mene. Kaa, ekèlekèlè!

<sup>27</sup> Yéyè kî mmulenga anyi? “Bintu byàkadiku, bidiku abi, ne byènzekà abi.” Ntèmu umwe, bàbidì, bàsàtù. “Bintu byàkadiku, byùdi mwenze abi; bintu bìdi munkaci mwà kwenzeka mpindyewu ebi; ne bintu bìikalà mwà kwenzeka.” Ne musangu wònsò, ànu menemene, menemene pa Dìyì. Ànu Nzambi nkààayèndè ngudi mwà kwenza nàнку. Kaa! Twètù katwèna ne disànkà dyàbùngì menemene bwà bintu ebi anyi?

<sup>28</sup> Mpindyewu, cìvwà cyèenza ne ngàngateku kaacikondo kakesè bikolè kasàkidila, mbwalu Billy ùvwa ne cyà kangata mukàjèndè ne mwànà. Kì yéyè ne: “Papa, kùbangi kuyiisha to too ne pàngààlukilà.” Pa nàнку, ndi—ndi ngèela meeji ne ùkaadi mwàlukile mpindyewu. Nènku bikèngela bwà mèmè kwangata dîbà dikùmbàne, nànsha bishi. Kàdi ndi nteeta bwà kulekela byà mèbà ànaayi à didicinta àntù nnuwejamù mwaba ewu abi, ne kudìvwija dyà tusunsa makumi àsàtù ne tutaanu, makumi ànaayi, nudi numòna's, ne kuteeta bwà kudìlama.

<sup>29</sup> Mpindyewu, bàkangeelela nsèke musangu kampànda mu Chicago mwàmwa. Mvwa mufikishe ku tusunsa makumi àsàtù, anyi cintu kampànda, makumi àsàtù ne tutaanu. Nènku dyàlumingu dishààle dilòòlò òvwa ànu dyà tusunsa makumi ànaayi ne tutaanu cyaààà. Billy kwamba ne: “Udi bulelèlè munkaci mwà kwakaja, papa. Ndi ndyùmvwà maleela bwèbè wèwè, bwà bwalu ebu.”

<sup>30</sup> Èè, pàmwàpa, mu dindà emu, bwà kudìvwijaku kaacifwànyikijilu kakesè kàà kàlaasà kàà Dyàlumingu, ncyàkunulama ntàntà mupìtepite bule to. Pa dîbà adi nudi mwà kupàtuka kuya kadyà didyà dyènù dyà mundaamuunya, ne kusambila, ne kwalukila dilòòlò edi bwà masangisha à dyondopa. Netwikalè mwà kwenza mulongo wà babèèdi dilòòlò edi bwà kusambidila babèèdi.

<sup>31</sup> Mpindyewu, nwènù bamanyè bantu mu nyùngulukilu amu, mwaba kanà wònsò, biikàle bàsaama ne baswè bwà kubàsambidilabò, nùlwe naabù kaaba aka dilòòlò edi. Nwamònu anyi? Byòbì bikèngela bwà nwènù kulwa naabù, mùshindù kanà wònsò, nùlwe naabù mwaba ewu. Nwamònu anyi? Kì cintu cyà musinga ncyòci aci, ncyà ne, lwàyi naabù kaaba aka dilòòlò edi. Tudi tusangila bwònsò pàmwè. Mùshindù awu. . . Mbikolè bwà kwenza mabìikila, kuya ku mwaba ne ku mwaba; pashiishe nushiya muntu kampànda, nènku kùdi njiyà mikolè. Kàdi bu mèmè mwà kubàfikisha bwònsò mu kaaba kàmwè, dîbà adi mvwa mwà kubàsambidila. Mpindyewu, bu



nwènù mwà...Bantu bwôbò baswè bwà kubàsambidilabò, bàdi...Wèwè udi wamba ne: “Nebàcyènzè anyi?” Kaa, cyà bushùwà’s. Nebàbàsambidilè. Nulwe naabù. Bu Mukalenge mwà kwanyisha, netwikalè kaaba aka, bwà kusambidila bantu bônso. Bwalu, ndi ndyumvwa ne nkòkelu mwisâtù awu ùdi munkaci mwà kukwàta mudimu, nudi numòna’s, ne—munda mwànyì. Nènku ndi—ndi—ndi muswè kusambidila bantu bwônso.

<sup>32</sup> Mpindyewu tubuululàayi, mu dindà emu ku Mufundu wà kale wà ciibidilu ùmvwà bu mwangate mu dilwijakaja dilòòlò dishàale adi, mwikale mbùngila ne tulù bulelèlè, ne kufùnda ndambù mukwàbò wa Mifundu yà kuya naayi. Ne kwangataku cyenze bu cintu cipetela kùdì mukwàbù. Mvwa muumvwa mwanèètù kampànda, musangu kampànda, ùkwata mudimu ne cyena-bwalu eci. Nènku mèmè kudyàmbidila... mèmè kuwùfùnda mwaba awu. Mèmè kudyàmbidila ne: “Èè, ngèèla meeji ne nèncifunde, bwalu ncifwànyine kulwa kungambulwisha.”

Misangu yàbùngì tutu twenza nànkù. Ndi mmòna ne, bààbùngì bàà ku nwènù kaaba aka, nudi ne kapesè kàà dibèji. Nènku mwambi ùdi mwà kwamba cintu kampànda, ne pashiishe neù—neùfike pa kaaba aku, cintu kampànda necikulengè munda mwèbè amu. Nènku díbà adi pìikalàbi ne Nyumà Mwímpè ngudi wènza nànkù, díbà adi neùbangile kwibakila ànu pa kaaba aku aku mene, mukenji bwà Mukalenge. Nènku aci’s mmwòmò. Nkaadi mumònemòne mu masangisha, kwônso kúyaayà aku, ànu bayiishi ne bantu bafùnda. Abi’s mbímpè. Tudi—tudi kaaba aka, ki citùdì balwile kaaba aka, mbwà kuteeta kukwàcishanganakù mu bule bwà njila eyi.

<sup>33</sup> Nènku mpindyewu tubuululàayi mu Bwàkabuulwibwà, nshapità mwi3, mu bikondo byà èkèleeziyà, biikale twambulula cikondo cyà èkèleeziyà. Kàdi mpindyewu tudì...tudi... mwaba awu. Èyowà. Ndi mufwànyine kwangata cyena-bwalu cìmwèpelè eci, ne Nyumà Mwímpè, kuyiishaPù bidimu lukàmà kàdi nciyi mfika ku dimana cìdì mu Cyôci aci to. Bwalu, mu cyena-bwalu cìmwèpelè eci, bu mùdì byena-bwalu bikwàbò byônso byà mu Bible, Nciswikila cyônso pàmwè.

Nènku ndi muswè kwangata mutù wà cyena-bwalu cyànyì, mu dindà emu, wà eci ne: *Mmunyi Mùndì Mwà Kucìmuna?* Mpindyewu, ndi musungùle cyôci eci bwalu ndi ngèèla meeji ne ncikondo cìvwà kaciyi cikèngelà bwà twètù kulekela Nyumà wa ditabuluja úfwa nànsha. Tudi ne cyà kutùngunuka ne ditàbuluja, díbà dyônso bafùùlùlùdìibwe, ditùkù dyônso edi. Pòlò mmwambè ne bìvwa bìkèngela bwà “kufwàye ku ditùkù ne ku ditùkù, bwà Kìlistò wàmòna mwà kwikala ne mwoyi.” Ne katwèna ne cyà kulekela ditàbuluja adi difwa to, munda mwètù.

Mpindyewu, Bwàkabuulwibwà, nshapità mwi3, ne kubangila ku mvensà wa 21, tudi tubala nunku.

*Ewu wàcimuna nèmmupèeshè bwà kusòmbayè naanyi mu nkwasà wanyi wa butùmbi, ànu mündi . . . mucimùne, ne musòmbè ne Taatù wanyi mu nkwasà wendè wa butùmbi.*

*Ewu udi ne maci, ùmwè cidi Nyumà wàmbila maèkèleeziyà.*

<sup>34</sup> Nuvwakù bamòne di—dilongolola dyà cyôci aci anyi? Nwamònu anyi? “Kusòmba Naanyi mu nkwasà Wanyi wa butùmbi,” kí ne “*pa nkwasà Wanyi wa butùmbi to.*” “*Mu nkwasà Wanyi wa butùmbi,*” aci mmu mwaba Wèndè wà bukòòkeshi. Nwamònu anyi? Nènku mwaba awu, bu—bu mùdi Kilistò mwikàle Mukòòkeshi, Mukòòkeshi wa nkwasà wa butùmbi mu cikondo eci, wà bukòòkeshi mu kaabujimà bwà Nzambi, kí mwikalà kàbìdi Èkèleeziyà Nendè, Mukàji-musèla mwikalè Nendè, mu nkwasà Wèndè wa butùmbi, mu mwaba wònsò wà bukòòkeshi. Nwamònu anyi? Kí ne “*pa nkwasà Wanyi wa butùmbi to,*” kàdi “*mu nkwasà Wanyi wa butùmbi,*” nwamònu’s, mùdi bukòòkeshi Bwèndè bùkafika amu. Nkwasà wa butùmbi ùdi kumutù kwà bukòòkeshi kampànda, ne—ne bukòòkeshi bùdi ànu bukafika too ne ku mikàlù yàbù aku. Ne eci ncyùmukila ku Cyendèlèlè too ne ku Cyendèlèlè. Anji elàayi bì ànu meeji ku bwalu abu!

<sup>35</sup> Mpindyewu, patùdi tulonga cyôci eci apa, kiipàcilà kàanyi kàà cyôci eci kakèena ànu bwà kulwa apa bwà—bwà kubwela neenù mu bwobùmwe to. Cyôci aci, ndi munange kucyènzà. Kàdi bu—bu mémè ne mpunga wa kucyènzà, ndi mufwànyine kulwa kwèbè kumbèlu, kukulabula ku cyanza ne kuyiikila neebè, ne kusòmbela panshi, kudyà neebè cyàkudyà cyà mundaamunya; ne kusòmbela paanshà, mwinshì mwà dilèji dyà mucì, ne kuyiikila ne kubwela neebè mu bwobùmwe katanci.

Kàdi patùdi tulwa kaaba aka, tudi kaaba aka bwà kiipàcilà kasungùlùke kàmwèpelè. Ewu nnzùbu wa dilongolwela bilèmà. Eci’s ke nkwasà wa butùmbi. Eci ke nkwasà wa butùmbi wa Nzambi, ne cilumbulwidi cidi cìfùmina mu nzùbu wa Nzambi. Nènku mwab’ewu ngutùdi tudisanga pàmwè, tudisanga mu dinanga, muntu ne mukwèndè, ànu mùtù beena Kilistò nkàayabù mwà kunangangana. Kàdi, mwòmò emu, tudi—tudi ku—ku—ku—ku bulombodi bwà Nyumà Mwìmpè. Nyumà Mwìmpè ùdi munkaci mwètù. Nènku tudi kaaba aka bwà kwikala . . . bwà kudikenketa mu twètù, bwà kumòna mapanga èètù, bilèmà byètù, ne mùshindù utùdi mwà kudipetuwila kutùvwà ne cyà kwikala, kuya ku mwaba utùvwà bafwànyine mwà kwikala mpindyewu; kuumukila ku mwaba utùdi, ne kuya ku mwaba ùvwà ùkèngela bwà twètù kwikala. Nènku kí citùdi tulonga ncyôci aci. Bambi bàdi bàlongela myaba ayi, bwà

cisàmbà cyàbò. Pàdìbò bà mòna bantu, dipangila dyàbù, díbà adi bàdì bàbangila pa cyòci aci.

<sup>36</sup> Mpindyewu, àbìdì àdì paanshì aa, ngèèla meeji ne bivwa bìkèngela bwà èkèleeziyà pàmwàpa kwikalayè ne cyà kwela cidya citàmbìdile ndambù pa díbà edi. Ncyèna ndìlongolola bwà kucyènza mu dindà emu to, bwà kuleeja maalu aa. Kàdì ndi—ndi ngèèla meeji ne, àbìdì aa, bu Mukalenge mwà kwanyisha, kumpàla kwà twètù kuyiisha pa Mpungi ayi, Ndi muswè bwà—bwà—bwà kutwàdila Èkèleeziyà ànu cintu kampànda cìvwà—cìvwà cìkèngelà bwà nwènù kumanya, ngèèla meeji, mpindyewu.

<sup>37</sup> Nènku mpindyewu tudi twakula pa cyòci eci ne: “kucìmuna.” Mwakù awu *kucìmuna*, mu bushùwà bwà bwalu, nudi bamanyè cìdiwu ùmvwija. Bìkèngela wikale ne cintu kampànda cyà kucìmuna. Nènku cìkondo cyà èkèleeziyà eci cìvwà Nyumà Mwìmpè wàmba kaaba aka eci, mu Cìkondo cyà Èkèleeziyà wa Laòdikiyà, ànu mutùvwà bacìlonge amu’s, cìvwà cìkèngela ditàndishiihwa. Bivwa bìkèngela bwà Laòdikiyà kutàndishiihwayè, bwà dipangakanangana dyèndè—dyèndè bwà Kilistò. Cìvwà cyèlè Kilistò pambèlù, mu—mu cìkondo cyàbò. Ne Kilistò ùvwà pambèlù, ùteeta bwà kwalukila munda amu. Kì dinanga ndyòdì adi. Paanyimà pàà Yèyè mumanè kwipaciibwa mu nzùbu Mwèndè Sungasunga, ùvwà ùteeta bwà kwalukilamù, wàmba ne: “Ewu wàkàngula ciibi, Mémè nènbwelè kùdiye.” Nwamònu anyi? Èkèleeziyà, yèyè mwine, mu kaabujimà, ùvwà muMupàtule.

<sup>38</sup> Kadi mpindyewu mònaayi. Dibìikila Dyèndè mwab’ewu kí ndyà bambila ànu èkèleeziyà to. “Ewu wàcìmuna.” Nwamònu anyi? Kì ng’èkèleeziyà to; nùnkù’s cìvwà kwikala yèyè bu mukàji, nwamònu’s, mubidi wà èkèleeziyà. Kàdì cìdì “ewu wàcìmuna,” muntu nkààya wàcìmuna awu, mpindyewu.

<sup>39</sup> Nènku cintu cìvwà ne cyà kufikila Laòdikiyà. Mpindyewu tudi tumòna, díbà adi ne, bamanyè ne eci n’Cìkondo cyà Laòdikiyà, ne bamanyè ne eci cìkondo cìdì cìkèngela ditàndisha ditwè ngwe bu keelà dyà kùdì Nzambi. Cìdì cìkèngela ditàndisha ditwè ngwe bu keelà. Nènku pàdì balombodi bàà èkèleeziyà bèètù bàvwijiibwa batekètàngàne ne bamòtòke, bu mùdì kaakù mukolè kampànda kumpàla kwà bankàna bèndè, cyònsò cìdìbò bènza ncipwàngàne. Nènku bàdì . . .

<sup>40</sup> Bàtu bambàmbe bikolè ne, Nzambì ùtu Nzambì mwìmpè wa dikèma, mu mùshindù wà ne bàteeta kuvwija Nzambì ànu kaakù munène mumòtòke. Nudi numòna anyi? Kàdì Yèyè kèna nànkù to. Yèyè n’Taatu, ne Taatù wa bwakàne, bwà kulongolola bilèmà. Ne dinanga ditu misangu yònsò ànu dìlongolola bilèmà. Nwamònu anyi? Dinanga ditu dìlongolola bilèmà. Nànsha dyòdì ditàpa bibì byà bishi, didi ànu dìlongolola bilèmà.

Maamù mulelèlè neàlongololè bàna bèndè ku bilèmà. Taatù mulelèlè neàlongololè bilèmà. Nwamònu anyi? Bu wèwè ànu

mwà kuteketangana ne kumòtotoka, ne kucilekela . . .

<sup>41</sup> Mwva munkaci mwà kusambuka pa citùpà cyà kale cyà mucì ditùkù adi, kwìnshì kwà—kwà musùlu, anyi citùbo babiikila ne cintènàntènà. Ki mémè kutumpikila pa citùpà cyà mucì aci. Lwà pambèlù apa, civwa cimwènèka cimpè, cimwènèka ànu mùdi citùpà cyà mucì munènè wà kale wà hètre. Kàdi pangàakatùpikilapù, kaa, cipesa cinène kwapukacikù. Ùvwa mubolè bulelèlè ne mumòtòke. Mémè kwamba ne: “Mùshindù awu ke ùdi beena Kilistò bènda bashààla.” Mbatwè mu mpèkaatù ne matomboka, ntàntà mule, too ne mùdìbo bashààla bamòtòke. Kabàcyèna mwà kutwala bujitu to, nànsha kakesè. Kì—kì mbamanyè cidì bucimunyi bùmwiya to. Ki mémè kubanga kwela meeji ku cyena-bwalu eci, dîbà adi. Kucimuna, kulama Mwoyi munda mwèbè. Pààkapàtukà mwoyi, ki cyàkafikishà citùpà cyà mucì aci ku ngiikàdilù awu aci. Nwamònu anyi? Nènku kucivwijaci cibì bikolè kutàmba pàvwàci mu ditàmbà dyà mucì mùvwà màyi amu.

<sup>42</sup> Nènku dîbà adi, mwaba awu, paùdi wangata mwena Kilistò, udi ne cyà kwikala mwena Kilistò awu, ùlekèlè Mwoyi wà Nzambì wùpàtuka munda mwèndè, ne dilabula, disànkà dyà kusadila Kilistò; ne, kwikala ne mwoyi mu èkèleeziyà mùdi cyà bwena aci munkaci mwà kwenzeka, ùdi ùbola ne lukàsà misangu yibìdi, èyo, pàdiye ne mwoyi mwòmù amu.

<sup>43</sup> Pa nàнку, twètù tuteeta bwà kulonda Mukenji wa cikondo, anyi nangananga eci citùpà cyà Mukenji, bivwa bikèngela bwà twètù kwikala ne mwoyi dîbà dyònsò mu Mwoyi wà Kilistò. Nwamònu anyi? Bwalu, byòbì kabiyi nàнку to, udi ujànguluka apa, ne mumanyè bintu byùdi ne cyà kwenza ebi, kàdi kùyì ubyènza to, Bible mmwàmbè ne: “Ewu udi mumanyè mwà kwenza cidì cimpè, ne kàyì ùcyènza to, bwèndè yèyè mmpèkaatù.” Dîbà adi udi ulwa mumòtòke, mubolè, paùdi utàpuludiibwa ne Mwoyi wà Nzambì. Pa nàнку, dyènzèjaayi ne byònsò bìdi munda mwènù, bwà kushààla mu Mwoyi wà Kilistò, bwà nwènù kwikala nukwama mamuma.

<sup>44</sup> Tudi tumòna cikondo citùdimu ne mwoyi eci. Ncimwè cyà ku bikondo byà bitàmbe bunène byà ku bikondo byònsò. Cikondo cyà Èkèleeziyà wa Laòdikiyà eci ncitàmbe bunène cyà bikondo byònsò byà èkèleeziyà, bwalu ndekeelu wa cikondo ne dibwela mu Cyendèlèlè. Nènku, dîbà adi, ke cikondo citàmbe bunène cyà mpèkaatù. Kùdi mpèkaatù yàbúngì mu cikondo eci kutàmba mutùbì kacya kwònsò eku. Ne makolè à Sàtaanà àdi—àdi misangu yàbúngì makolè bwà kuàlwisha kutàmba mùvwàbi mu cikondo kanà cyònsò. Nwamònu anyi?

<sup>45</sup> Mwab'ewu, kale wàwa mu bikondo byà ku cibangidilu, mwena Kilistò ùvwa mufwànyine, bwà dijikula dyèndè dyà kwikala èkèleeziyà . . . dyà kwikala wa Kilistò, ùvwa mwà kukòshiibwa mutù bwà bwalu abu. Ùvwa mufwànyine

kushipiibwa, ne kupàtudiibwa mu dikèngà dyèndè amu, ne kuya katwilangana ne Nzambi, lùkàsàlùkàsà.

Kàdi mpindyewu mwena lukuna nyèwù mubwele, mu dîna dya èkèleeziyà, ne yêyè awu ngudi useeswishangana bikolè. Eci ki cikondo cinène cyà diseeswishangana. Pààbì's, Kilistò wàkamba nànkù ne: “Nyumà yìbìdì ayì yìvwa mwà kwikala mifwànàngàne menemene mu matùkù à ndekeelu mu mùshindù wà bifwànyine kuseeswisha Basungula mene bu byòbì mwà kwenzeka.” Nwamònu anyi? Nwamònu anyi? Nwamònu anyi? Vùlukàayi ne, Kilistò wàkaakula bwà cisàmbà cisungula bwà ditùkù dyà ndekeelu. Nwamònu anyi? “Mbifwànyine kuseeswisha Basungula mene bu ne bivwa mwà kwenzeka.” Bifwànàngane bikolè! Bantu bàdi ne mwoyi mu mùshindù wà ne, bantu bàdi mwà kwikala ne nsòmbelu mukezùke, nsòmbelu wa cijila; kàyì wa mpèkaatù, wa bendi bàà masandi, ne banù bàà maala, ne beena mashimi, ne beena manayi à mfranga to. Bàdi mwà kwikala ne mwoyi kumutù kwà cyòci aci, kàdi kabàyi ànu Nendè to.

<sup>46</sup> Eci ke ci—cikondo cyà Mwoyi, Mwoyi wà Kilistò sungasunga, mùdì, bi—bivwà munda mwà Mubidi Wèndè, bivwà munda Mwèndè abi.

Dyàmbedi, mu dibingishiibwa, ku dibatiiza dyà mu màyi. Ciibìdì, ku Dilediibwa dipyadiyà, dyà Wesley, ku dijidiibwa, didì dikedulà. Ne ciisàtù, mu dibàtiiza dyà Nyumà Mwímpè, ku ditèeka dyà dibùngù dijidila adi mu mudimu. Nwamònu anyi? Mwàkù *kujidila* mbwena kwamba ne, mmwàkù wà mu cyena Ngelikà wùdì wùmvwija ne “musukula ne mutèeka ku luseke bwà mudimu,” kutèeka ku luseke bwà mudimu. Mpindyewu Nyumà Mwímpè ùdi ùditèeka mu mudimu. Nwamònu anyi?

<sup>47</sup> Nènku netùmonè ne: “Pàdì nyumà wa bukooyà ùpàtuka munda mwà muntu, ùdi wèndakana mu myaba myúme.” Ki cyòci aci menemene cidì èkèleeziyà mwenzè, ba-Baptistes, ba-Méthodistes, aba bàdi biitàbùuje dijidiibwa abu. “Pashiishe,” mwàkambà Yesù, “nyumà wa bukooyà wàkapàtuka awu, ùdi wàlukila ku mubidi wà èkèleeziyà ewu ne ùsangana nzùbu mulongolola, mukòmba mutòokesha, musòmba mukezùke, nsòmbelu mikezùke.” Èyo. “Kàdi pashiishe nzùbu awu yêyè kàyì mùjìibwe, basòmbamù to, dîbà adi ùdi wàlukilamù ne nyumà mibì mikwàbò mwandamutekète mibì mitàmbe mùvwàye, ne ngiikàdilù wa ndekeelu wa mwaba ewu ùdi misangu mwandamutekète mubì kutàmba mùvwàbi dyàmbedi.” Bivwa bìmpè bwà kushàalabò ba-Luthériens, kutàmba mùvwàbu mwà kwikala bwà kupeta Bukènkè abu ne kupanga kuBùlonda. Ki mùvwà kàbìdì beena Mpenta, nwamònu's, nudi bamanye cìndì muswè kwamba aci, nzùbu mmulongolola.

<sup>48</sup> Mbyènze bu mùmvwà nyiikilangana ne muntu kampànda, ditùkù adi, wàmba ne: “Bàdi ne ntemà menemene, nànsha mene

bisumbù byàbùngì byà cijila, bwà kubènga kubùikila Nyumà Mwímpè ne: ‘Nyumà Mwímpè,’ bwalu bàdi bàdimanyisha ne mbeena Mpenta pàdìbo bènza nàнку apu. Bàdi bàmba ne: ‘Spiritu Munsantu,’ nwamònu’s, kabàyi bàpanga kwamba ne: ‘Nyumà Mwímpè.’” Bwalu, beena Mpenta, bantu bèètù bàà pàtupù aba, bàdi bàCìbùikila ànu cìdì Bible wàmba aci: “Nyumà Mwímpè.” Pààbì, Nyumà Mwímpè ne Spiritu Munsantu ncintu cimwècimwè aci. Kàdi bwòbò mbadìmùke be bwà bwalu abu. Kì mbaswè kubadiibwa pàmwè ne baakudi bàà mu myakulu abu to; ne aci n’Nyumà Mwímpè, Yèyè mwinè. Nwamònu anyi?

Cyàkenzekà ncinyi dìbà adi? Pàvwà mwena lukunà, uvwa mulopòke mu dijidiibwa awu, uvwa mwele pambèlu awu, pààkaalukilàye ne kusangana nzùbu kàyi mùjiiibwe ne Nyumà Mwímpè to, mpindyewu ngiikàdilù wa èkèleeziyà nkudiswika ne—ne nsangilu wa maèkèleeziyà, ne Nsangilu wa Maèkèleeziyà wa Buloba bujimà. Nènku ke ngiikàdilù mpindyewu udi umuswikakaja ne cyena Kàtòlikè kàà cyena Loomò ne bikwàbò byàcì byònsò abi, ne mpindyewu mmubì bikolè misangu mwandamutekete kutàmba mwàkadiye pàakapatukàye mu bwena Luther. Ke kùdì muntu mukamufikìshe aku.

<sup>49</sup> Ne pashìshe tàngilàayi Cikondo cyà Èkèleeziyà wa Laòdikìyà paanyimà pàà bamanè kupeta Nyumà Mwímpè, ne dimanya ne Nyumà wa Nzambì munda Mwèndè, ne pashìshe byenzedi byà Nzambì mbivila kùdiye, ne ùCìbùikila ne “mmudimu mubi.” Dìbà adi nudi nwamba bishi bwà aci? S’ki mwaba wùdì Kilistò mwediibwe pambèlù pàà èkèleeziyà Wèndè Sungasunga ngwòwò awu. Nwamònu anyi? Yèyè... Kacyà kaCyàkaMuleejakù mu èkèleeziyà to ànu too ne mwàkafikàbì ku Laòdikìyà; ne pààkafikàye ku Laòdikìyà, Ùvwa mwediibwe pambèlù pàà èkèleeziyà Wèndè, ùteeta bwà kwalukilamù.

<sup>50</sup> Mpindyewu, nwamònu’s, dibingishiibwa kacya kaditu diMubweje nànsha. Dijidiibwa dyàkaMusukwila ànu kaaba cyanàànà. Kàdi pààkalwà dibàtiiiza dyà Nyumà Mwímpè, dyàkaMubweja munda mwà bantu. Nènku mpindyewu kuMwelabò pambèlù, pààkabangàYe kuDìleeja, ne Yèyè ùdi umwèumwè awu makèèlèlè, leelù, too ne kashidi. BààkaMwela pambèlù bwalu bàvwa badìvwije dingumba, ne—ne Nyumà wa Mukalenge kènà ùpetangana ne dingumba dyàbò nànsha. Nudi bumvwè mpindyewu anyi? Bwà ne, mbàMwele pambèlù. “Katwèna bwalu ne cintu nànsha cimwè cyà lubuku elu to. Ncyà—ncyà dyabùlù. Ndubuku ànu lwètù elu. Anyi...” Nwamònu anyi?

Kabèèna buumvwa to. “Ne mèsù, kàdi kabàyi mwà kumòna to; ne macì, kàdi kabàyi mwà kuumvwa to.” Nwamònu anyi? Nzambì ùdi ùtabaja mèsù ànu mùdiYe muswè amu. “Yèyè ùdi ùpapisha mwoyi wà ewu udiYè ùpapisha awu, udiYè muswè kupapisha awu, ne—ne—ne ùfila Mwoyi kùdì aba bàdiYe muswè kupèèsha abu.” Ke cìdì Mifundu myàmbè.

<sup>51</sup> Mpindyewu, tudi tumòna mèbà atùdì tusanganyibwamù aa, citùpà eci, ne tudi tumòna civwàci. Ne Nyumà Mwímpè ùdi munkaci mwà kutàndisha cikondo cìdì ciMwele pambèlù aci. Kàdi, mu biinè byònsò abi, nukààvwaku bamòne ne: “Kùdì ewu wàcimuna” anyi? Nànsha mene mu cikondo cyà èkèleeziyà wa buloba, cyà lwonji aci: “Ewu wàcimuna.”

<sup>52</sup> Tudi tusangana kaaba aka ne Nzambì ùtu misangu yònsò ànu ne bacimunyi. Ùkaadi mupete bacimunyi mu cikondo ne cikondo cyònsò. Kùtu misangu yònsò, dìbà dyònsò, mu cikondo ne cikondo cyònsò cikaatùku pa buloba aci, Nzambì ùtu misangu yònsò ànu ne muntu kampànda udi Yè mufwànyine kutwà byanza Byèndè, bu ntèmù pa buloba. Kacya Yèyè kàtukù mwanjì kubùla ntèmù to, nànsha mùdibi ne misangu mikwàbò ànu umwe. Kàdi muntu kampànda ùdi ùcimuna, mpindyewu, bu mùdì bansantu bàà kale abu.

<sup>53</sup> Nènku muntu wa—wa maalu malenga wa dikèma, mumanyi wa dibàla, ùvwa wàmba, paanyimà pàà *Bitampì Mwandamutekète*, yèyè kwamba ne: “Mwanèètù Branham, wèwè bu—bu mulongeshi wa ne bifwànyikijilu, wa ne mifwanu’s we, èyowà,” yèyè ne, “mmunyi muwikalàku mwà kutèeka Èkèleeziyà awu mu Dyambwibwa kàyì ne cikondo cyà Dikènga dinène, mu cifwànyikijilu?” Yèyè wàkamba . . .

Nudi numòna’s, cyòci ciikàle ne cifwànyikijilu kampànda, kùdì ne cyà kwikala . . . kùdì ne cyà . . . Kwòkò kwikale mubidi wà bwalu, kùdì ne cya kwikala cifwànyikijilu kùdì mubidi wà bwalu awu wufùmina. Nènku cintu cyònsò cìndi ngàmba, ncyà bushùwà ne, cìdì ne cifwànyikijilu. Cidi ne cifwànyikijilu. Wèwè udi ne mundidimbì. Ne Bible mmwambe ne: “Bintu byà kale bìvwa mundidimbì wà bintu bipyabìpyà bicilwalwà.”

Yèyè ne: “Kàdi mpindyewu nudi bangàta Dipungila Dikùlukulu bu mundidimbì. Mpindyewu,” yèyè ne, “newènzè cinyi ne Èkèleeziyà ewu?”

<sup>54</sup> Muntu ewu ùdi ùfumina ku . . . Muntu munène, mulongeshi munène mwikale mulundà wanyì wa katapula-katèeka, muntu mwímpè wa dikèma, ne yèyè mmwanèètù mulenga wa dikèma. Ncyèna—ncyèna mwà kudìdinga kwakula díyì dibì nànsha òmwè bwà mwanèètù awu nànsha. Ncyèna mufwànyine kucyènzà to, nànsha bìshi. Bu—bu . . . Bu mwena Kilistò, ncyèna mufwànyine kwakulaku cintu cibi nànsha cimwè to. Yèyè—yèyè—yèyè kèna ùpetangana naanyì pa cyena-bwalu cìmwèpelè aci to, kàdi yèyè—yèyè’s mmwanèètù wa musinga mukolè. Tudi tudyà pàmwè. Nènku, kaa, yèyè’s ùdi ànu muntu mwímpè be. Ndi ngàngata cikàndakànda cyèndè, mbala maalu èndè mafùnda. Ne yèyè ùtu ùfùnda àmwà à ku àànyì pàànyì maalu, ne bikwàbò. Nènku ndi mwangate byena-bwalu bùngì cyanààna byà ku bìntùku—bìntùku mubale—mubale byà mu maalu èndè mafùnda awu, bìntù mumutèèlèje wàkula. Yèyè

mmuntu munène, kàdi yéyè—yéyè kènà ànu mwà kupetangana naanyi to. Ndi ngaanyisha aci, bwà meeji èndè matòòke. Nànsha mùdiye kàyi ànu, umwe wa ku bantu bàà tulèndàlèndà aba to, bàdi ànu ne cyà kupetangana ne cyònsò cyùdi wamba aci. Yéyè ùdi ne dyèndè ditwishiiibwa dyà sungasunga, ne yéyè ùdi ùditwa nyama ku mikòlò. Mémè ndi ngaanyisha aci. Ne yéyè mmuntu mwímpè. Kaa, mémè—mémè ncyèna mulongeshi anyi mumanyi wa dibàla to, nànsha kakesè, kàdi muntu ewu mmulongeshi ne mumanyi wa dibàla.

<sup>55</sup> Kàdi ncyèna—ncyèna mwà kupetangana nendè to, bwalu ncyèna mmòna nàngu to. Kàdi, kacyèna citàngila lupàndu to, ncitàngile Dilwa dyà Mukalenge. Ùdi ùmòna ne bidi bìkèngela bwà Èkèleeziyà àpicilè mu cikondo cyà Dikènga dinène, bwà kukezudiibwayè. Mémè ndi ngàmba ne Mashi à Yesù Kilistò ngàdi àkezula Èkèleeziyà. Nwamònu anyi? Kacyèna cikèngela. . .

Ndi ngiitabuuja ne èkèleeziyà ùdi ùpicila mu cikondo cyà Dikènga dinène, bulongolodi bwà èkèleeziyà, kàdi Mukàji-musèla kèna ùpicilamù to. Udi mufwànyine kusungula mukàji ùdi ne cyà kukezula kumpàla kwà wèwè kumusèla anyi? Nwamònu anyi? Mukàji-musèla wa Kilistò mmusungùdiibwe, ne Yéyè mmusungula. Ne Yéyè m'Mukàji-musèla wa Nzambi, Mukàji-musèla wa Yesù Kilistò.

<sup>56</sup> Nèngu mpindyewu yéyè kwamba ne: “Neùfwanyikijè aci bishi, piikalà Mukàji-musèla awu ùpàtuka, ùbànda kumpàla kwà Yéyè kupicila mu cikondo cyà Dikènga dinène?” Yéyè ne: “Ndi ne Mufundu wùdi wùkuleeja ne Èkèleeziyà ùdi ùpicila mu cikondo cyà Dikènga dinène.”

Mémè ne: “Balàayi ànu Citampì Ciisambòmbò, kwàjiki, yéyè ùdi mwaba awu mene mu cikondo cyà Dikènga dinène. Kàdi tudi tusangana ne, kumpàla menemene kwà cyòci aci, Mukàji-musèla ùkaadi mumane kuya. Nwamònu anyi? Ùdi mu Butùmbi dībà adi's. Kèna ne byà dikezudiibwa to.” Nwamònu anyi?

“Ewu udi ungiitabuuja Mémè ùdi ne Mwoyi wà kashidi, ne kàakupiihiibwa anyi kupita ku Cilumbulwidi to, kàdi mmuumùke ku lufù muyè ku Mwoyi.” Kilistò wàkafila mulayi wà ne katwèna nànsha mwà kwimana ku Cilumbulwidi to. Nàngu Wàkangata kaaba kàanyi mudiswile, too ne mùndi mudishikàmine kakùyì mpatà to. Pàndi mufwidiibwe luse, ndi mufwidiiibwe luse. Mmunyi mùdiYe mwà kumpàtula mu nzùbu wa dyeyekiibwa, mwikale ne kakànda kàà mushinga mufuta, piikalà. . . Mmunyi mùdiYe mwà kwikala Mupikudi wanyi, ne kumpàtula mu nzùbu wa dyeyekiibwa, eku musùmbishidyanganyi wa bapika mutùngùnuke ànu ne kwamba ne ncidi wendè? Ndi ne kakànda kafùnda kàà mushinga mufuta, amen, nwamònu's, kafùnda kùdi Mashi à Yesù Kilistò. Nwamònu anyi? Mpindyewu, mu cyòci aci, ki kutùdi tukafika aku's.



Yèyè ne: “Mpindyewu, mmunyi muwàfùdisha bwà, kutàpulula Mukàji-musèla musungula ùdi wamba awu mpindyewu, mmunyi muwàteekà Cyòci aci mu cimfwànyi?”

<sup>57</sup> Mémè ne: “Bîmpè be.” Mémè ne: “S’ki cyòci eci. Mpindyewu, mu Maatàayi, nshapità wa 27 ku mvensà wa 51.” Bu twètù. . .

Ngǎnji ànu kucìbala, ne pashìshe tudi—tudi tucyùmvwà bîmpè. Dìbà adi tudi tusangana ne cìvwa cileejìbwe mu cimfwànyi anyi to, anyi cìdi Mukàji-musèla musungula awu. Maatàayi, nshapità wa 27 ku—ku mvensà wa 51. Èyo. Tudi tubala nùnkù, ku dipoopediibwa dyà pa nkùrusè dyà Mukalenge wetù.

*Nènku, mònaayi, cilùlù cikùdika cyà ntempèlù  
cyàkapandiibwa mu bìbìdi kuumukila kuulu too ne  
kwinshì; . . .*

<sup>58</sup> Mpindyewu, aci cìvwa mmikenji. Mikenji kujikilayi mwaba awu mene. Bwalu, cilùlù cikùdika cìvwa cìpangisha disangisha bwà kubwela mu bintu byà cijila byà Nzambì. Ànu mwakwidi mulaaba nguvwa ubwela muntwamu, ne, ciinè aci, musangu ùmwè ku cidimu. Nudi nuvùluka anyi? Mpindyewu, Nzambì, ne cyanza Cyèndè Yèyè mwinè, mònaayi ne: “kuumukila ànu kuulu too ne kwinshì,” kî nkuumukila kwinshì too ne kuulu to. Cìdi muulu bule bwà metèlè dikumi ne àbìdi ne ntenteku. Mònaayi ne, kî nkuumukila kwinshì batàngile kuulu to, kàdi “kuumukila kuulu batàngile kwinshì,” bileeja ne cìvwa cyenza kùdi Nzambì. Kupanda cilùlù cikùdika aci mu bipese bìbìdi, dìbà adi muntwamu, muntu kanà yònsò ewu, ewu yònsò udi muswè awu, ùdi mwà kulwa ne kwabanyangana cijila Cyèndè. Nwamònu anyi? Èyo.

*. . .kuumukila kuulu too ne kwinshì; ne buloba  
bwàkakanka, ne mbwebwe yàkapandika;*

*Ne nkita yàkabuululuka; ne mibidi yàbùngì yà  
bansantu bàvwa balààle yàkabùika,*

*Ne kupàtukabo mu nkità paanyimà pàà dibùikà  
dyèndè dyà ku lufù, . . .bààkabwela mu cimenga cyà  
cijila, ne bààkamwènekela bààbùngì.*

<sup>59</sup> Ke Musungula awu, Mukàji-musèla awu. Kî ng’èkèleeziyà yònsò wa beena Yuda wakapàtuka mu ciinè cikondo aci to. Bwònsò bwàbò bààkafilà mulàmbù wùmwèwùmwè awu. Bwònsò bwàbò bàvwa mwinshì mwà mashi meela panshì à mwàna wa mùkòkò awu. Kàdi kùvwa Kasùmbù kasungula; nènku Kasùmbu kasungula aku, bwalu mbwènze ànu budituuta panshì, bwòbò ke bààkiitabuuja bulelèlè Cyòci aci ne meeji matòòke. Mpindyewu ndi ngàalukila ku mwákù *kucìmuna*. Mpindyewu shàalaayi bakwàte aci’s. Aba bàvwa bacimùne ànu bulelèlè, ne meeji matòòke wònsò bàfilà mulàmbù ùmwèwùmwè wàkafilà bakwàbò abu awu, kàdi, ne meeji matòòke, kucìmuna maalu à pa buloba. Pààkafidiibwa mulàmbù wa dijimija naawù mpèkaatù mùvwàbì bikèngela bwà bwalu bwàbò, bàvwa

bàsanganyiibwa mu mpàladiizò too ne ku mwab-...cikondo aci. Pàakenjiibwà cikondo aci, bàakacimuna ne bàakashààla biikishe, balààle tulù; nwamònu's ne: "mibidi yàbúngì yà aba bàvwà balààle mu lupwishi," nwamònu's, balààle.

<sup>60</sup> Mpindyewu, bu ne tuvwakù ne díbà, tuvwà bafwànyine kwalukila ku Danyèlè, pàvwàbi ne, Danyèlè, musungula uvwa mucimùne awu. Ki Yèyè kwamba ne: "Kànga Mukàndà awu, Danyèlè, bwalu wèwè newíkishe mu cyèbè citùpà. Kàdi pàalwa Mfùmù awu, wíkala mwà kwimana bwà bantu awu, wèwè newimane mu citùpà aci." S'ki cyòci eci. Danyèlè, mupròfetà wa Nzambì ewu, wàkamòna cikondo cyà nshìikidilu munkaci mwà kulwa. Ki Yèyè kwamba ne: "Danyèlè, wèwè newimanè mu cyèbè citùpà mu ditùkù adi." Kadi's ki yèyè ewu, upátuka; kàyì Izàlèèlà mujimà to, kàdi Izàlèèlà cimfwànyì cyà Mukàji-musèla. Mpindyewu, bakwàbò bàà Izàlèèlà kabèèna bàpátuka to ànu ku dibìikà dyà ku lufù dyà bantu bwònsò.

<sup>61</sup> Nèku mpindyewu, ku Dilwa dyà Mukalenge Yesù, aba bàdi cyà bushùwà banangè Dilwa Dyèndè, bàdi ne mwoyi bwàdi abu; pààmwenekàYe mu dyulu, Èkèleeziyà udi mufwè mu Kilistò neàbiikè ku lufù, ne bwòbò abu nebàshintulukè mu katanci kakesè. Bakwàbò kabàakumanya kantu nànsha kàmwè pa bwalu abu to. Vùlukàayi ne: "Bàakamwènekela aba bàvwà mu cimenga." Nwamònu anyi? Dya—Dya—Dyambwibwa nedìikale mùshindù awu. Netùmòngane muntu ne mukwèndè, nèku netùbàmòne. Bakwàbò bàà pa buloba kabàakubàmòna to. Nebùmùshiiwbè mu musokoku. Tudi bindìle cikondo aci!

Pashìishe twalukila pa buloba bwà Bukalenge bwà bidimu cinunu bwà butùmbi abu, pashìishe bidimu cinunu. . . "Bafwè bakwàbò kabààkiikala ne mwoyi to munda mwà bidimu cinunu."

<sup>62</sup> Ki pashìishe kulwakù dibìikà dyà ku lufù dyà bantu bwònsò, ki, Izàlèèlà mujimà. . . Nèku kàbìdi, tàngilàayi kwàka, bàpostòlò dikùmi ne bàbìdi abu, bankambwà dikùmi ne bàbìdi abu, bwònsò bàvwà baleejìbwe. Ne twètù katùtukù banji kufika ku abi to. Pàmwàpa, bu Mukalenge mwà kwanyisha, netùkafikèku mu Dipungila, mùvwà bimanu byà yaspà abi, ne mabwe dikùmi ne àbìdi, biibi dikùmi ne bibìdi, bishimikidi dikùmi ne bibìdi, byònsò bìdi bileejìbwe abi. S'ki bòbò aba pa nkwasà yà butùmbi dikùmi ne yìbìdi, banjelo-baamisànjeela bàà mu miinè matùkù awu, bwà kufikisha dinyooka kùdi aba bàakabenga mukenji wàbò abu. Amen. Ki kufikaku díbà dinène adi. Èyowà's.

<sup>63</sup> Ditùkù kaayìpu's wè, cikondo kaayìpu citùdi ne mwoyi's wè! Mùshindù mwine wùvwàbi bikèngela bwà twètù kudikenketa's, Èkèleeziyà. Mpindyewu tudi twakula bwà bintu bìcilwalwà ebi, bìikalà mwà kulwa. Mpindyewu, leelù ewu, twánjàayi kwalukila

apa bwà kumòna, kudikenketa twètù biinè ne kumòna ní tudi mene mu Diitabuuja.

<sup>64</sup> Mpindyewu twanji kwakula bwà ndambù wa bacìmunyi munda mwà tusunsa tukesè, mu matùkù à cikondo cyà Noà, cìvwa cìfwànyìkìjìibwe kùdì Yesù Kilistò aci, bwà ne ncìfwànàngàne ne leelù ewu.

Ndi ngèèla meeji ne nkushààdila tusunsa dikùmi. Dìbà adi nènkumbajè tusunsa makùmi àsàtù. Pàànyì ncìdì ànu mbilangikù, dìbeji dyà kumpàla. Nèndekelèku ndambù wawò ku luseke, mèmè mwà kukòkesha, bwà kupeta cìdì . . .

<sup>65</sup> Mu cikondo cyà Noà, cìfwànyìkìjìlu cyà leelù ewu: Yesù wàkacìtèèla, ne wàkamba ne: “Ànu mwàkadìbi mu cikondo cyà Noà, ke mwìkalàbi kàbìdì ku Dilwa dyà Mwànà wa muntu. Mu cikondo cyà Noà, ke mwìkalàbi kàbìdì ku Dilwa dyà Mwànà wa muntu.” Mònaayi ne, kùvwa bantu bònsò bàà kumpàla kwà mvulà yà Noà, pàmwàpa miliyò yà bantu, kwàkadi bacìmunyi mwandamukùlù. Bantu mwandamukùlù kucìmunabò, aci’s cìvwa mbacìmunyi balelèlè, bashùwashùwàlè. Kùvwa bânà bàà balùme bàsàtù bàà Noà ne bakàji bààbò, ne Noà ne mukàjèndè. Bacìmunyi mwandamukùlù, bààkabwela mu bwátu mu cikondo cyakàne. Bààkacyenza bìshi? Bààkatèèleja Dìyì dyà Nzambì. Kabààkasanganyìbwa pambèlù pàà ciibi to. Bààkasanganyìbwa munda mwà ciibi.

<sup>66</sup> Kaa, wènù balundà bàànyì bananga, kanùlekedikù ciibi aci cìkàngiibwa to. Yesù wàkamba ne: “Ànu mwàkadìbi mu ditùkù adi amu, ki mwìkalàbi kàbìdì ku Dilwa dyà Mwànà wa muntu.” (Twasàkidila, mwanèètù.) “Ki mwìkalàbi kàbìdì ku Dilwa dyà Mwànà wa muntu.” Mpindyewu, kùdì muntu kampànda wìkala mwà kusanganyìbwa pambèlù pàà ciibi aci.

Bààbùngì bàà kùdìbo bàvwa bafwànyìne kwìkala ne meeji mìmpè, ne: “Dìngà ditùkù, bu bintu bu nàнку mwà kwenzeka, netùbwelè ne Mwanèètù Noà, bwalu yèyè mmuntu wa maalu malenga.” Kàdi, nudi numòna’s, cyàkabweja ànu bantu mwandamukùlù munda amu.

<sup>67</sup> Mpindyewu, elàngànaayi meeji bikolè mpindyewu. Panwìkalà nulènguluka, nwenda numototoka, bwelàayimù. Lwìjakaja, ne lùkàsà lwònsò, bwalu ciibi ncìfwànyìne kukàngiibwa dìbà kanà dyònsò.

<sup>68</sup> Ne kùtu misangu yònsò ànu bwátù mu cibucilu cyà Nzambì. Kùvwa bwátù mu matùkù à Noà, bwà disùngila dyà cisàmbà Cyèndè. Kùvwa mushèètè mu matùkù à mikenji, mushèètè wà bujaadiki. Mu matùkù à mikenji, bàvwa bàlonda mushèètè wà cipungidi.

Nènku kùdì cipungu ciisàtù mpindyewu; bu cikondo cyà Noà, cikondo cyà Lotà, ne mpindyewu’s ki cikondo eci. Kùdì bwátù mpindyewu. Ne bwátù abu kì ndìngumba to, anyì kì byenzi bìmpè byùdi wenza to. Cìdì ne “ku Nyumà umwèpelè,”

Loomò 8:1, “tudi bwònsò babàtìjùbwe mu Mubidi wùmwèpelè, mu mwaba wà bukòokeshi bwà Bukalenge abu, dibàtiiza dyà mu Nyumà òmwèpelè.” Nànsha wèwè mwimpè wa bìshi, nànsha wèwè mubi, cyònsò cidìku aci, udi usanganyibwa mu Bukalenge abu ku—ku dibàtiiza dyà mu Nyumà Mwimpè. Nwamònu anyi? Ki mùshindù ùmwèpelè ùdi ucimuna awu. Bwònsò bàdi mwinshi mwà Mashi meela panshì mbacimunyi, bwalu kwèna mwà kudicimwina, wèwè nkààyebebè to. Yèyè ngudi ukucimwina. Wèwè udi mwikishe.

<sup>69</sup> “Nèmmanyè munyì dîbà adi, Mwanèètù Branham, ne mèmè ndi munda Amu?” Tàngilà umòne ne nnsòmbelu wa mùshindù kaayi wùdì nendè. Anji kenzakana eku ne eku. Ùmonebi ní ùdi ùpàtukila ànu mu wèwè amu, bìdyènzekela. Anyi, bìdì bikukèngela kudyenzeja ne kukokangana, wamònu’s, dîbà adi udi ucyenza. Kàdi kuteeci kucyenza to. Kacya ukaadiku muteete anyi? Eyowà. Kuteeciku to.

<sup>70</sup> Mbyenze ànu bu mùdì kubweja dibòkò dyà mwànà mukèsè wa mu mabòkò mu dibòkò dyà mutèlù, nudi numòna’s. Yèyè’s ùdi ùbandisha, ùpwekesha, kwà nakà, ne bikwàbò byònsò. Nwamònu anyi? Yèyè kènà mwà kucyenza to. “Vwala nkooci’s, munanga wanyi.” Kènà mwà kumuvwala to. Kaadibòkò kakesè aku kàbànda, kapweka, katwa eku ne eku. Bìdì bikèngela cyanza cyèbè cicolè aci.

Kaa, mùshindù ùndì ndyumvwa ne disànkà’s, ndi ànu mwà kulekelela cyanza cyànyì kùdì Taatù, ngambà ne: “Mukalenge Yesù, ncyèna mwà kubwelaMu to. Ngambùlwishèku Wèwè. Mvwaðikeku Wèwè nkooci.” Mèmè ndi ndekela kuteeta. Mulekelaayi ànu Yèyè àcyènzè. Nwamònu anyi?

<sup>71</sup> Mwànà mukèsè awu yèyè ànu mutùngùnùke ne kuteeta ne: “Kaa, mèmè’s ndi mwà kucyenza. Mèmè’s ndi mwà kucyenza.” Ne yèyè’s ùdi ànu myaba yònsò. Kènà mwà kucyenzaku to.

Nànsha wèwè kwena mwà kucyenza to, anyi mèmè ncyèna mwà kucyenza to, kàdi bu twètù ànu mwà kushààla bapùwe ne kuMulekela ùcyèna’s. Ndi ànu ndilekelela kùdìYe cyanààna ne: “Mòna, Mukalenge, ki mèmè ewu. Ndekèleku mèmè ànu—ànu ngìkale cintu cyanààna. Ndi—ndi ndilekelela. Wèwè mbweje cyanza cyànyì mu mwaba mujaalàme.” Ki bucimunyi mbwòbù abu. Ki bucimunyi mbwòbù abu.

<sup>72</sup> Cintu cìdì cìkèngela bwà wèwè kwenza nkudicimuna wèwè mwinè, meeji èbè, cintu cyèbè, ne kudilekelela wèwè mwinè kùdìYe. Yèyè ùdi ùkucimwina. Yèyè mmumanyè njila; twètù katwèna bamanyè to.

<sup>73</sup> Kàdi mu cikondo cyà Noà kùvwa bacimunyi mwandamukùlù, nènku’s ki bwòbò bàakabwela. Bàakasanganyibwa munda amu.

Mpindyewu tàngilàayi, balundà bàanyi. Ndi ngèèla meeji ne bàdi munkaci mwà kukwata eci pa mukàbà wà mèyi’s.

Nènku cyôci ciikale ku tèleviziyô, anyi to kî nku tèle... mfwilaayikù luse, pa mukàbà wà mèyi. Cyônsò cyûdi wenza aci, wêwè udi munkaci mwà kutèeleja mpindyewu awu, anyi wikala mwà kutèeleja paanyimà awu, dîbà dikaadi diye bikolè be, ne udi bulelèlè ne meeji mîmpè, kàdi ikàlà musanganyîbwe munda amu. Mpindyewu, kùlwanganyikù to. “Kî ng’ewu udi muswè, anyi ewu udi unyeema to, kàdi n’Nzambi.” Lekèlaayi ànu Nzambi. Dilekèlèlè ànu wêwè mwine kùdiYe ne tûngunuka ne kuya, ne diitabuuya dipwàngàne, disànkishîibwe, dyà ne: “Cidi Nzambi mulayè Yèyè ùdi ne bukolè bwà kucyenza.” Kî ndiya kashààla wa mu dîngumba dîmwè to, dikwàbò dîngumba, wànyeemena ku *cikampànda*, *cikansanga*, anyi *cikankènga*, kuteeta *cikampànda*. Dilekèlèlè wêwè ànu kùdi Nzambi, ne endà Nendè, mu ditalala, mupùwe, kabàyi bakwimanyika to. Tûngunukà wêwè ànu ne kwenda Nendè. Ncyà bushùwà.

<sup>74</sup> Aci’s ke cingààkambila mwanèètù wa balùme uvwa ànu ne—ne mutù munyungùlùke awu. Nwamònu anyi? “Dilekèlèlè ànu kùdiYe. N’Yèyè ewu apa, Yèyè Udi mumanyè cyûdi mwenze awu, ne cidi cifikishe buumùntù bwèbè kudyenya mùshindù *kampànda*, ne byònsò abi. Yèyè’s mmumanyè byònsò bwà bwalu bwèbè, mpindyewu Yèyè’s ùkaavwa mukwambile ànu cyà kwenza’s. Mpindyewu,” mûngààkambà, “cintu cîmwèpelè cidi cîkèngela bwà wêwè kwenza nkuya ànu kacyenza cyanààna. Mbwenà kwamba ne, kupwa mwoyi maalù wònsò àkaadi mapite, kwenda, kwikala ne mwoyi bwà matùkù àcîlwalwà, mu Butùmbi ne Bwikadi bwà Nzambi.”

Bacimunyi mwandamukùlù.

<sup>75</sup> Mu matùkù à cikondo cyà Danyèlè, kwàkadi bacimunyi bànaayi bàakadi mwà kutwàla diteeta dyà kapyà ne ntambwe.

Mpindyewu, tudi batekemene bwà kuteeciibwa. Adi ndileesòna dîmpè bwà mwanèètù wanyì—wanyì wa balùme udi paanyimà pààpa wàwa, yèyè pèndè. “Ewu udi ulwa kùdi Nzambi ùdi ne cyà kwanji kuteeciibwa dyàmbedi.” Mwediibwe ku diteeta (cinyi?) ne Dîyi. Ki diteeta dyà Nzambi ndyòdi adi. Nudi nudìtabuuya anyi? “Ewu udi ulwa kùdi Nzambi ùdi ne cyà kuteeciibwa.” Aci’s cidi cileeya ànu mwànà mulelèlè, dîbà adi, nwamònu’s, kwediibwa ku diteeta. Nènku pàdi diteeta dilwa . . . Kwèna mwà kucimuna pàdi diteeta kadiyi dikupèèsha to. Ne pàdi diteeta difidiibwe, mbwà kumòna ní udi mwà kucimuna anyi to. Ki Yesù kwamba ne: “Kùdi ewu wàcimuna,” diteeta adi. Diteeta adi ki cintu cyà citàmbe bunène cikaadiku cîkwènzèkèle. Ngèela meeji ne ncifundiibwe mu Mifundu, Peetèlò wàkamba, ne: “Mateeta ètù àdi kutùdi ne musinga kutàmbe ngòlò wa musinga mukolè.” Neikondo cyà dyediibwa dyà ku diteeta. Ncileeji cîmpè cîmwèpelè kutùdi cyà ne Nzambi ùdi neetù, patùdi tuteeciibwa apu, bwalu bânà bwònsò bàà Nzambi mbeediibwe ku diteeta ne bateeciibwè.

76 Nènkù Danyèlè, muntu, mupròfetà; Shadràkà; Meeshàkà; ne Abèdènègò; Danyèlè ùvwa mupròfetà; ne aci cívwa mbunène bwà Èkèleeziyà mu ditùkù adi, ndi nswa kwamba, Mukàjì-musèla. Kùdi èkèleeziyà búngì cyanààná, yàmba kufika ku mìliyò yìbìdì mijimà yàkapweka kuntwaku. Kàdi kùvwa. . . Aci's ke cívwa búngì bwà bacìmunyi. Ne bacìmunyi abu bààkeediibwa ku diteeta. Ne mucìmunyi yònsò ùdi ne cyà kwediibwa ku diteeta. Kàdi pààkambabo ne: "Vilàayi nwènú cìdì Dìyì dyàmba aci, bwà cyanààná nudi nweidiibwa mu cikùtù cyà kapyà," bààkabèngà ní ncinyì cyònsò pa kuumusha Dìyì adi.

77 Nènkù pààkapèeshiibwà Danyèlè diteeta, bwà ne bìvwa bìkèngela bwà yèyè kuvila cívwa Dìyì dyambè, bwà ne bàvwa ne cyà kwìnamina batàngile ku ntempèlu, bu mwàkasambila Solòmo, nènkù Yèyè ùvwa mwà kubàsùngila ku bintu byònsò, Nzambì ùvwa mwà kutèelejila mu Dyulu bu bwòbò mwà kutàngila ku ntempèlu ne kusambila, ne bambe ne: "Muntu ní nganyi yèyè musambile munda mwà búngì bwà matùkù aa, ne twètù tudì beena Meedàayi ne Peelààsà, bàdì kabàyi mwà kushintulula anyì kukùdimuna mikenji yètù abu, muntu awu nebàmwelè mu bwinà bwà ntambwe," bààkamwela butèyi, yèyè, ndi ngèèla meeji ne mupròfetà awu ùvwa mumanyè aci, kàdi bàvwa bamwèle butèyi, wàkenda ne didìpwekesha dyònsò, pààkakùmbana cikondo cyà yèyè kusambila, pàvwbì ne, yèyè ùvwa mumanyè ne, kwabu ku mulela mu Yelusàlèmà mwàmwa, kùvwa mulàmbù wà wùlàkuka kapyà pa cyoshelu, Danyèlè kààkaciina batentekedi abu to.

78 Kubàndishaye ridò, ne kunzulula màdìdiishì, ne kupwekaye ku binù byèndè, ne kwela byanza byèndè muulu kùdi Nzambì ne kusambila. Bwà cinyì? Ìkalè ne mwoyi anyì mufwè, yèyè ùvwa ne buciimunyi. Nènkù, ki bwà cinyì, ùvwa ne buciimunyi búngì cyanààná mu mùshindù wà ne ntambwe kayìvwakù mwà kumudya to. Yèyè—yèyè kucimuna.

79 Kùdì. . . Shadràkà, Meeshàkà, Abèdènègò bààkapeta buciimunyi búngì cyanààná mu mùshindù wà ne ntambwe. . . mu mùshindù wà ne kapyà kakàvwakù mwà kubwòsha to. Nudi bamanyè's, buciimunyi ncintu cikolè bwà kwosha kubùtula, anyì kudyà, anyì ní ncinyì cyònsò. Nwamònu anyì? Pa nànkù, bwòbò, bàvwa naabù.

80 Ndi mufwànyìne kuteela muntu mukwàbò. Mu matùkù à Lotà, Yesù wàkacitèela, kùvwa ànu bàsàtù bààkacimuna, Lotà ne bânà bèndè bàà bakàjì bàbìdì. Kì nnànsha mukàjèndè to; kààkacimunakù to. Yèyè—yèyè wàkabanga. Yèyè ncimfwànyì. Mvwa kujinga twikalakù ne dìbà's. Tusunsa twànyì makumi àsàtù tukaadi tujika mpindyewu's. Nwamònu anyì? Nwamònu anyì? Mukàjì ewu, wàkenza maalu wònsò bìmpè, wàkashàala.

81 Mpindyewu bìkèngela nnùpè bwalu ebu, bwà katanci kakesè cyanààná. Bààbúngì bèènú mbuumùke, bwòbò pààbò. Bààbúngì

bàà kunùdi mbashiye bintu ebi, bwà kwangata kaaba kèènu, paanyimà pàà nwènu baCikenkètè mu Mifundu ne basanganè ne nCilelèlà. Nudi bamòne dishindika dyà Nzambì wa Bukolè bwònsò; kî nku cikampànda to, cìdi muntu kampànda *mwàmbè* ne civwa dishindika to. Cìdi Bible mwambè ne ke ciikalàku aci, kàdi's ki Cyòci eci munkaci mwà kucyènta. Nwènu kumòna ne Cidi m'Bulelèlà. Nànkù, nudi bapàtùke, bwà kushiya Sodomà, kushiya dīgumba, kushiya bìdi binwiswike ku twitabàayi abi; bwà kulonda Kilistò, ku Nyumà Mwímpè mwikàle ùDishindika ku Dīyì difunda dyà Nzambì. Mu ngaakwilù mukwàbò, nwènu kwangata Bible pamutù pàà twitabàayi. Nukaadi bamane kupàtuka, bwà kulonda.

<sup>82</sup> Èè, mukàji wa Lotà wàkenza cintu cìmwècìmwè aci, nudi bamanyè's. Mukàji awu wàkapàtuka, bwà kuyayè ne Lotà, kulonda bàyendè, bānà bèndè, bananga bèndè, kàdi kaCivwa mu mwoyi wèndè to. Yèyè ùcivwa ànu munangè maalu à pa buloba. Pa nànkù bìdi mwà kwenzeka ne wèwè ùbangè, kàdi maalu à buloba maciikàle ànu munda mwèbè amu. Nwamònu anyi? Yèyè kàakacimuna to. Kàdi nànsha nànkù yèyè's ùvwa ànu mumate mu njila amu, ndekeelu wa byònsò byàkamufikisha ku cibulà. Byàkamukèngela bwà kushààlaye kacya wàtangila bwà musangu wà ndekeelu, mule ne wà ntàntà. S'ke mwaba wàkamubàkwilabò awu. Kuteeci kutàngila paanyimà to. Kwikadi ne majinga awu to. Tùngunukà ànu ne kuya. Tèeka meeji èbè ku Kàlvaryò tùngunuka ne kuya mutàngile kùdi Kilistò. Nwamònu anyi? Nwamònu anyi?

<sup>83</sup> Wàkabanga, bu mucimunyi, kàdi kàakacimunakù to. Kaa, yèyè's wàkalekela dīgumba. Yèyè wàkashiya. Wàkapatuka mu Sodomà, ne Lotà. Kàdi yèyè uvwa muswè kwalukila cyànyimà bwà kukòsesha nsuki yèndè. Nudi bamanyè cìndi muswè kwamba aci. Nwamònu anyi? Bìvwa bikèngela bwà kwalukilayè. Kàvwa ànu mwà kutwàla di—diteeta adi to. Bìvwa bikèngela kutàngilayè cyàkàbìdi paanyimà, bwà kumòna civwà bakwàbò abu bènza. “Kaa, nudi bamanyè's, mvwa ne balundà bìmpè kuntwaku, twamb'eku twamb'eku. Nènku, twamb'eku twamb'eku, eci ncifwànyine kwikala ànu kaamunyungakeenu kakesè—kakesè. Ncyèna mumanyè ní ncifwànyine kwikala cilelèlà anyi to. Ndi—ndi mupete ànu dīyì dyà muntu ewu bwà bwalu abu, nànsha mùdiye bàyanyì amu. Kàdi nànsha nànkù. . .” Mpaasàtà wenù mbàyeenù, mu ngaakwilù wa nyumà, nudi numòna's. “Mpindyewu, nànsha cyòci cìfwànyine kwikala cyà bushùwà anyi to, ncyèna mumanyè to. Pàmwàpa yèyè, dībuulula dyèndè kadivwa dilelèlà to.”

Dìbà adi, wèwè kùyi musànkishìbwe ànu menemene to, kwèna mumanyè ànu menemene ne Cìdi Dīyì dyà Nzambì to, dìbà adi—dìbà adi kwèna mwà kuya to. Nwamònu anyi? Bikèngela wikale mutwishìbwa ànu menemene. Bikèngela wikale mumanyè. Kì ng'ànu kwamba ne: “Èè, ndi mumòne

bakwàbò bàcyènza to. Ndi mmòna cimanyinu.”

<sup>84</sup> Nudi bamanye’s, Izalèlèlà wàkabanga, mvwa mwà kwamba cintu cìmwècimwè aci ne kucìbweja kaaba aka. Bààkabanga, ne búngi bunène bwà miliyó yìbidì yà bantu, kàdi bààkajikija ne bantu bàbidì. Cyà bushùwà. Bààkamòna byenzedi byà Nzambi. Bààkamòna dimwèneshiibwa dyà Nyumà. Bààkamòna bishimà binène, byà bukolè munkaci mwà kwenjiibwa mu Èjiiipìtù mwàmwa, ne bikwàbò byònsò, ne bààkabanga. Kàdi kacivwa—kacivwa mu myoyi yàbò to. Kabààkacimuna to. Bààkapatuka ànu cyanààna. Ki Yesù kwamba ne: “Ne bààkabùtukila mu cipèèlà,” ne mbafwè bwà Cyendèlèlèlè. “Muntu ne muntu wa kùdìbo mmufwè,” mbwena kwamba ne ditàpuluka dyà Cyendèlèlèlè. Muntu ne muntu wa kùdìbo wàkaboleta mu cipèèlà.

<sup>85</sup> Kàdi kùvwa bantu bàbidì, Yoshùwà ne Kaalèbà. Nènkù pààkafikàbi ku diteetangana dyà makàndà, bipùmbishi bìvwa binène menemene mu mùshindù wà ne bààkamwènèka bu tupasu ku luseke lwàbò. Yoshùwà kwelaye lubila lukolè ne Kaalèbà, bàmba ne: “Twètù tudi batàmbe ne bukolè bwà kucyènza.” Bwà cinyi? “Nzambi ngudi mwàmbe nànkù.” Nènkù bàvwa bacimunyi. Bààkacimuna’s. Bwòbò’s ki bàvwa bapetè dyèse, mu bulongolodi bujimà bunène bwà bantu abu, bwà kubweja Mukàji-musèla mulelèlà, musungula awu mu buloba bulaya. Yoshùwà ne Kaalèbà ku mwalu wà mvità aku, bu tulààlà túbìdì twà masàlaayi, kubàlombolabo buludi ne ku musùlu, ne kusabukabo musùlu, e kubwela mu buloba bulaya. Bwà cinyi? Bààkiitabuja Dìyi, kabàyi batàngila nànsha cinyi to.

<sup>86</sup> Pashiishe, Daatànà kujuuka. Daatànà, èyowà’s we, wàkajuuka, ne Koolà pèndè kujuuka, ne kuteetabo bwà kwamba ne: “Muntu ewu ùdi ùteeta kudìtèèka kumutù kwètù twètù bwònsò; yèyè ngwa cijila kutàmbe bakwàbò bwònsò.” Paanyimà pàà Nzambi mumanè kushindika muntu awu mu kantu ne kantu. Bwòbò kwamba ne: “Netùbange ànu kasùmbu kàà bantu nènkù netwènzè *cikampànda*, *cikansanga*, anyi *cikankènga*, nènkù netwènzè malongolodi ètù awu, netwènzè. . .” Kàdi ki kufwàbo ne kubùtukabò.

Kàdi bantu bàvwa ne Dìyi dyà Mukalenge adi abu, ki kushààlabò naaDì, ki bwòbò kuyabò kuntwaku.

“Kì ng’ewu udi ubanga to; ewu udi ujikija.” Bààbúngì bàdi bàbanga lubilu, kàdi kùdi Umwèpelèè udi ùlùjikija. Nekwikalè èkèleeziyà yàbúngì yibanga, bisùmbù byàbúngì byà bantu. Nekwikalè Cisùmbù cìmwèpelè cyàjikijà. Abu’s ki bacimunyi abu.

<sup>87</sup> Ditùkù dyà Lotà, èyowà, byàkakèngela bwà mukàji ashààle mulèngàmìne bikolè, ntàntà mule paanyimà. “Kaa, nkàadi nshiya *Kampànda* lwà kuntu kwaka, bikondo bìmpè bitàmbe bitùvwà tucìcila kale abi. Ncyàdyàkubipwakù mwoyi to.” Ki kusanganyiibwaye, mukàngila pambèlù, ànu mwàkadibi mu



matùkù à Noà. Kumukàngilabo pambèlù, kakùyì luse to, e kubütukayè. Ne dikunji adi—adi dicitu ànu kacya diimana mwaba awu ne leelù ewu. Bàdi bàmba (mémè ncyèná mumanyè to) ne udi mwà kwapulakù kapese kààdi ne dyòdi dyùmbà disasa kàbìdi, dikunji dyà mukèlè. Nukààdikù bamòne fòtò wa *Sodomà Ne Gomòlà* awu, nenùmonè dikunji dyà ku cibangidilu dyà mukèlè dyàkiimàna mwaba awu adi.

<sup>88</sup> Mpindyewu, kùdi dishiilangana pankaci pàà dikunji dyà mukèlè ne Dikunji dyà Kapyà. Nwamònu anyi? Bikèngela ùkùdimukè mùshindù kampànda. Èyowà.

<sup>89</sup> Mònaayi ne, mu cikondo cyà Yone Mubàtiiji. Mu cikondo cyà Yone Mubàtiiji, kwàkasanganyiibwa bàsambòmbò bàakacimuna. Bikondo byònsò, bàvwa ànu ne bacimunyi. Mu cikondo cyà Yone bàvwa ne bàsambòmbò, bàvwa n'Yòzefù ne Màriyà, Zakàayi ne Èlizàbèètà, Simèonà ne Anà. Mulùme ne mukàji, mulùme ne mukàji, mulùme ne mukàji; nwamònu's, cimfwànyì cyà Kilistò, Èkèleeziyà; Kilistò, Èkèleeziyà; Kilistò, Èkèleeziyà; Kilistò, Èkèleeziyà. Nwamònu anyi? Nwamònu anyi?

<sup>90</sup> Mònaayi ne, byàkabangila ku muntu wa mu bufùki ewu. No-...Mo-...Yòzefù, muntu wa mu bufùki, Yòzefù, ùvwa cinyi? Mukoonyi wa mabaya. Pashiishe mwakwidi, yèyè ùvwa cinyi, nwamònu anyi? Mwambi mu nzùbu wa Mukalenge; Zakàayi. Ne kuumukila ku cyòci aci, ne kùdi Simèonà, mupròfetà ne mupròfetà mukàji. Nwamònu anyi?...?...Dibingishiibwa, dijidiibwa, dibàtiiza dyà Nyumà Mwimpè. Amen. Kanwènaayikù nucimòna anyi? Cipwàngàne menemene. Bàsambòmbò kucimunabo. Bakwàbò bwònsò abu, bàakalambula mulàmbù wàbò ne bikwàbò byònsò, kàdi aba bàvwa Basungula. Bàakacimuna.

<sup>91</sup> Mònaayi cikondo ne cikondo cyònsò cyà èkèleeziyà. Bààmwomùmwe kucimunabo pàvwàbò, mwànà yònsò wa mu cikondo cyònsò cyà èkèleeziyà, wàkacimuna diteeciibwa dyà cikondo aci. Ndi ne Mifundu mwaba ewu. Ncyèna ngèèla meeji ne tudi menemene ne dībà dyà kuyileea to, kàdi tudi bamanyè ne cyònsò cyà ku bikondo byà èkèleeziyà. Byà mwomùmwe mpindyewu. Bidi ànu mùdi muntu kampànda udi. . .

<sup>92</sup> Nwamònu's, mungàmbi ku mbangidilu amu ne, udi mulediibwe mucimùnyiiibwe. Ne dilediibwa adi kadyènakù mwà kukufikisha ku—ku Mwoyi to, bwalu udi mulediibwe mucimùnyiiibwe. Ne wèwè udi mu buloba bucimùnyiiibwe, munkaci mwà bantu bacimùnyiiibwe, munkaci mwà twitabàayi micimùnyiiibwe, màngumba macimùnyiiibwe. Bikèngela ùfikè ku bucimunyi mu mùshindù kampànda.

<sup>93</sup> Cidi ànu mùdi cilòngò cyà mbata amu. Mwaba wùdi... Mbata, ngèèla meeji ne, ki cimwè cyà ku bilòngò byà bitàmbe bulenga bìdiku. Ntu mutàmbe kunanga bikolè bilòngò

binène byà mbata byà bikùnzùbile ne mbata wa mu majiba. Ngèèla meeji ne mbwalu bukòlè bwà kwikalakù cintu cimpè citàmbe cilòngò cinène menemene cyà mbata wa mu majiba, bàtu bàcìbiikila ne mbata wa pa màyi. Mùshindù mene ùdici cibàlakana's wè! Mpindyewu, cìdi cìfùmina penyi? S'nkaadimiinu kakesè, kasanganyiibwa lwà mwinshì mwà bitoci, mu dijiba dyà bitoci. Nènku kaadimiinu kakesè aku, kàbìdì, dibàlakana dyònsò diikala ne cyà kubàlakanamù adi, diti ànumù kacya kale awu, pàdidi mu bitoci amu. Kàdi cìdi ne cyà kulwangana, ku ditùkù ne ku ditùkù, cimanyè ne kùdi cintu kampànda. Mu mîdimà. Mu bukooya. Mu bitoci. Mu busenu bwà menemene. Mu bitoci mùdici cisòmbèle amu, kàdi cìdi cìpanda njila waci mu bitoci, màyi à bitoci, ne màyi, ne myaba yà màyi matèngèbele ayi, too ne mùdici cìpàtula mutù wàci pamutù, mu bukènkè, ne kuleeja patòòke cìdi cisokoka munda mwàci dîbà dyònsò.

<sup>94</sup> Ngèèla meeji ne awu's mmucimunyi, uvwa, musangu kampànda mu mpèkaatù, wàkenza bintu bivwà bibi musangu kampànda, kùtácishikù meeji bwà bwalu abu mpindyewu to. Kale wàwa uvwa wenza bintu bivwà bibi, pashùshe, mpindyewu bwà cinyi kutàngila paanyimà cyàkàbìdì mu dijiba adi? Nwamònu anyi? Tàngilàayi, nudi ne . . .

<sup>95</sup> Nzambì, ku didyànjlila-kulongolola Dyèndè, nwamònu's, mmutwàle dimiinu edi ku mwoyi, ne dyòdì didi munkaci mwà kudisàka, nwamònu's, dilwa ku bukènkè. Ne mpindyewu, kumutù kwà byònsò abi, ncicimùne. Nwamònu anyi? Kacyèna cidileeja patòòke mwinshì *amu* to. Cìdi cyènda cibànda, bwà kudileeja patòòke.

Nànsha wèwè mwinè, mu mpèkaatù webè—webè, ne masandi, ne mu bintu byònsò byúvwà musòmbelemù abi. Kùvwà uleeja cintu nànsha cimwè patòòke to. Kàdi mùvwà dimiinu muntwamu, divwa dipetè mpùngà wà kudisàka mu Bukènkè. Nènku mpindyewu udi mu Bwikadi bwà Yesù Kilistò, ne Bukènkè bwà Mwànà. Bwàkapàtula patòòke cyúvwà bulelèlè ku cibangidilu aci. Nudi numòna cìndi nswa kwamba aci anyi? Wèwè kumòna Bukènkè. Wèwè kubwayisha bilòngò. Wàkashiya mwoyi wèbè mukàngula, ne mpindyewu wèwè udi mbata wa pa màyi.

<sup>96</sup> Nudi bavùlùke diyiiisha dyànyì pa mbata anyi? Révérend Mbata, mùshindù ùdiye ùkwàta mudimu's. "Nènku, kàbìdì, kàtu ùtela to. Ne kàbìdì, Solòmò, mu butùmbi bwèndè bwònsò abu, kàtukù muvwàle bu cimwè cyà ku byòbì ebi nànsha." Yèyè—yèyè—yèyè—yèyè—yèyè. . . Mutàngilaaayi numòne. Ùkaadi mudilongòlòle bwà kufil-. . . Kèna ne cidìye wàngata bwèndè yèyè nànsha cimwè to. Mbata kèna ùcyùka kantu nànsha kàmwè pa bìdì bitàngilà yèyè mwine to. Cìdiye wenza ncinyi? Yèyè—yèyè ùdi ùpàtula bulenga bwèndè abu patòòke, mwoyi wèndè, bwà bakwàbò kumònabò. Mwoyi wèndè mmuleejiibwe patòòke, bwà

bakwàbò bààmònakù butùmbi, cìdi munda mwèndè aci, cìvwà munda mwèndè mu bitoci abi. Mpindyewu yèyè ùdi ku lusongo.

Ke mucìmunyi nyèyè awu. Yèyè kucìmuna bitoci. Kucìmunayè bintu byà pa buloba. Nènku mpindyewu yèyè ùdi ùdifila cyanààna. Bantu bònsò bàdi mwà kumutàngila. Mwoyi wèndè, kwèna mwà kufùnkunapù munu to. Nwamònu anyi? Yèyè mmucìmunyi wa cyà bushùwà. Kwèna ne cyùdi mwà kwamba nànsha cìmwè bwà bwalu bwèndè mpindyewu to. Wàmba ne: “Mmupàtùkile mu bitoci.” Kàdi kèna mu bitoci mpindyewu to. Ùdi pamutù pààbi apu. Amen. Kwèna, díbà adi, mwà kufunkuna munu pa cìvwàye aci to. Yèyè ùdi cinyi mpindyewu? Ùdi ku lusongo.

<sup>97</sup> Díbà adi lubùlùbùlu lùdi lùpicila mwaba awu ne lwàmba ne: “Aci’s mmanànshì malenga be. Ngèèla meeji ne nènyekù bwà mpetèku cyànyì citùpà.”

<sup>98</sup> Yèyè ùdi ànu ùkàngula mwoyi wèndè cyanààna ne: “Lwàyaaku mpindyewu. Eyo.” Byònsò bìdi byàngacila kùdiye. Nwamònu anyi? Yèyè’s—yèyè’s mmpaasàtà mulelèlè. Ùdi ùleeja patòòke Butùmbi bwà Nzambi. Kàdi tàngilàayi kùdiye mufùmìne. Byàkakèngela bwà yèyè kucìmuna, bwà kwenza nànkù.

<sup>99</sup> Musangu kampànda, yèyè mulùme anyi mukàji bàvwa bansonga ne balenga kumòna, ne balenga kwìsù. Bàvwa ne mateeciibwa bùngi cyanààna à kupicilamù, kàdi bàakacìmuna. Nwamònu anyi? Bàakacìmuna. Mpindyewu bàdi munkaci mwà kuleeja patòòke bulenga bwà menemene bwà Kilistò mu nsòmbelu wabò. Mònaayi ne, bàleejila patòòke, mu bitoci.

<sup>100</sup> Yesù mmutùpèeshe cileeji, mùshindù wà kucyènza. Mpindyewu tudi baswè kumanya mùshindù wà kucìmuna. Yesù mmutwàmbile mwà kucyènza. Nwamònu anyi? Didìpwekesha’s! WàkaDìsenya mukàbà mu cimònu, kwangata ditwàyà, ne kwowesha makàsà à bayiidi màyi ne kubàkùpula. Nzambi mwine wa mu Dyulu wàkaDìpwekesha milongo.

<sup>101</sup> Katwèna baswè kupwekeshiibwa milongo to. Ki bwà cinyi bakàji kabàtu baswè bwà nsuki yàbò kuleepayi to, nwamònu’s, kabingilà kàdìbò kabàyi baswè kuvwala mùvwà bainàbànza ne cyà kuvwala to. Byà mwomùmwè, balùme kí mbaswè pààbo to, nwamònu’s, cìdi ànu cintu cìmwècìmwè aci. Kí mbaswè to. Bàdi—bàdi bàpwekeshiibwa milongo.

Kàdi, Yesù, díbà dyònsò! Tàngilàayi ne Yèyè ùvwa Nganyi. Bunène’s wè! Ndi ne cyà kwamba cintu kampànda. Bunène bùtu bùdìpwekesha. Cintu *cinène* citu cìdìpwekesha. Bunène’s wè!

<sup>102</sup> Nkaatu mupetèku dyèsè dyà kutwilangana, kutuutakeena ne bantu banène. Kàdi’s mbalumyàna bèèbè bàtùku ne cilàmbà cyà kushintulula aba, ne meyà makumi àtaanu mu mpàya yàbò ayi, àa kudidisha, ki mulumyàna ùdi wela meeji ne ùdi cintu kampànda pàdiye kàyi cintu to. Kàdi mvwa mwimàneku ku

luseke lwà bantu banène, ndi muswè kwamba ne bantu banène bavwale mitèèlù misùnsùke, ku mabòkò. Bàdi bàkufikisha ku didiyùmvwà ne wêwè ke muntu munène's. Nwamònu anyi?

Bunène's ndidipwekesha. Kanùpùku aci mwoyi to, Èkèleeziyà. Bunène bùtu bùleejibwa mu didipwekesha, kí mmùshindù mwímpè ùdì mwà kwikala to.

Mpindyewu, ncyèna ne meeji à kutùmbisha bukooya to. Ndi—ndi muswè kwamba ne mudipwekèshe mu nyumà. Nwamònu anyi? Ncyèna muswè ànu kwamba ne kupàtuka—kupàtuka ne kubenga kwowa màyi ne kudikezula to. Aci, udi ne cyà kucyenza. Aci's nudi bamanyè. Nwamònu anyi?

Kàdi ndi ngàakula bwà didipwekesha, didipwekesha dishùwashùwàlè, kí ncintu kampànda cyùdì ukwatakaja to. Cintu kampànda cìdì, ciikàlè didipwekesha dilelèlè.

<sup>103</sup> Yesù wàkatwàmbila mwà kucyènta. Wàkacimuna. Mbwenà kwamba ne... *Kucimuna* mbwenà kwamba ne “kutwàla diteeta,” ncyà bushùwà, mwàkenzà bansantu bwònsò bàà kale abu amu; bu mwàkenzà Yesù amu: munkaci mwà balwishi Bèndè bwònsò, Yèyè wàkatwàla diteeta. Cintu cyònsò cyàkaMuteetábo naaci aci, Yèyè wàkacitwàla. Mu mpàla menemene mwà disaamà amu, ne Yèyè mwikale Maasiyà, Wàkabòndopa. Mu mpàla mwà lufù, Yèyè wàkabààluja ku mwoyi. Kumpàla kwà Kàlvariyo, lufù Lwèndè Yèyè mwinè, Yèyè wàkalùcimuna ku diDilekelela. Bwà cinyi? Ku Dìyi. Yèyè ne: “Shimbùlaayi Ntempèlù ewu, ne Mémè nèmujùlè mu matùkù àsàtù.” Kí mùdì Dìyi dyambè nànkù. Nwamònu anyi? Nènku mu bwikadi bwà lufù, Yèyè wàkalùcimuna. Yèyè wàkacimuna lufù. Mu bwikadi bwà ifèrnò, Yèyè wàkatàmba ifèrnò ne kucimuna ifèrnò. Èyowà. Mu bwikadi bwà lukita, Yèyè wàkacimuna lukita. Bwà cinyi? Byònsò ku Dìyi, ne didipwekesha. Kaa, ekèlekèlè! Kí Muntu mulelèlè nyèyè awu. Kí Yèyè awu udi mwà kulwa cileejilu cyèbè. Nwamònu anyi? Yèyè wàkatàmba byònsò, kubicimuna.

<sup>104</sup> Tàngilàayi. Diteeciibwa divwa bwèndè Yèyè. Nudi bamanyè nànkù anyi? Bible mmwambè ne: “Yèyè wàkateeciibwa mu kantu ne kantu kwònsò bu mutùdì emu, kàdi kàyi ànu ne mpèkaatù to.” Wàkateeciibwa kùdì—kùdì kunwà kwà maaàlè. Wàkateeciibwa kùdì bakàji. Wàkateeciibwa kùdì cyònsò cìvwàku cyà kuteeciibwa naaci. Yèyè wàkateeciibwa kùdì cyònsò citùdì tuteeciibwàkù aci. Yèyè ùvwà Muntu, kàdi nànsha nànkù kùvwà mwà kuMufunkuna munu to. Èyowà's, mukalenge.

<sup>105</sup> *Kucimuna* mbwenà kwamba ne “kujingulula dyabùlù mu màyelè èndè wònsò.” Bantu bàabùngì bàtu bàmba ne: “Démon kàtukù to. Cidi ànu mbyejeeji cyanààna.” Kanwitabuujikù aci to. S'ki démon mulelèlè nyèyè awu. Yèyè's ngwa cyà bushùwà ànu mùdì wèwè amu anyi muntu kanà yònsò ewu. Démon mulelèlè, ne wèwè udi ne cyà kumujingulula ànu menemene. Udi ne cyà kumanya ne yèyè ndémon. Dìbà adi, musangu

ùmwèùmwè wûdì—wûdì umujingulula awu, ne umanya ne yêyè ndémon ne ùdi ukulwisha awu, díbà adi, bwà kucimuna, udi ne cyà kujingulula ne Nzambì udi munda mwèbè mmumutàmbe bunène ne bikolè, bwà ne Ewu udi munda mwèbè ùkaadi mumanè kumucimuna. Nènku, ku ngàsà Wendè, wèwè udi mumutàmbe bukolè. Amen. Kùdi bucimunyi bwà menemene, paùdi ujingulula.

<sup>106</sup> Udi utàngila paanyimà, wamba ne: “Ndi ngenza *cikampànda* ne ndi ngenza *cikansanga*,” díbà adi, to, wèwè—wèwè, udi mucimùnyìbwe.

“Kàdi kakwèna dipiìshiibwa kùdi aba bàdi mu Kilistò Yesù to, bàdi kabàyi bènda bilondèshile mubidi to, kàdi bilondèshile Nyumà.” Díbà adi udi umanya ne udi mucimùne.

Nènku udi mumanye ne yêyè ndémon.

Kwèna mwà kwamba ne: “Ndi ne dísaamà, ne ncyèná—ncyèná—ncyèná—ncyèná ngiitabuuja ne ndísaamà to.”

Kaa, èyowà’s, cintu’s mbubèèdi.

Udi ne kànsèrè, wèwè “kwèná wìtabuujiane nkànsèrè to.”

Cintu’s nkansèrè. Cintu’s nkansèrè.

Kàdi, vùlukàayi ne: “Ewu udi munda mwènù mmunène kutàmbe ewu udi mu buloba.” Udi ne cyà kumanya ne Nyumà Mwímpè udi munda mwèbè ùkaadi mumanè kucimuna cintu eci. Ne Yèyè ùdi munda mwèbè, ne wèwè udi mwà kucimwina ku Yèyè. Aci’s ncyumvwike menemene, ke mùshindù menemene ùdi Mifùndu mifundìibwe. Kucimuna’s!

Bikèngela ndwijakajè. Nkàadi mwenzè tusunsa makùmi ànaayi ne tùtaanu mpindyewu. Ndi cyà bushùwà ntàmbe kupìcisha díbà mpindyewu.

<sup>107</sup> Mònaayi ne, kucimuna’s! Nzambì udi munda mwèbè awu mmunène kutàmbe udi munda mwèndè awu. Nzambì wa buloba kàtu munène mùdi Nzambì wa mu Dyulu, udi munda mwèbè awu to, ànu mùdi mîdimà kayiyi mwà kwimana mu bwikadi bwà bukènkè to.

<sup>108</sup> Mpindyewu, mîdimà kayèna mwà kwimana mu bwikadi bwà bukènkè to. Nànsha mîdimà miikàle yà mùshindù kaayi, bukènkè nebùyìpatùle. Kabwèna mwà kutwa makàsà paanshì to. Butùmbi’s wè! Kàdi udi mwà kwangata mîdimà búngì búdi muswè abu, ne kuteeta kukàndameena bukènkè musangu kampànda, ùmòne cyàkenzeka.

Ki Yèyè awu udi munda mwèbè, m’Bukènkè. Ne ewu udi mu buloba mmîdimà. Pa nànkù, Bukènkè mbujaadike ne bùdi bùcimuna mîdimà, ne muntu udi mu Kilistò ne mumanyè ne yêyè mmucimùne bintu byà pa buloba. Amen. Kabicyèna biswikìibwe kùdi kàbìdi to, nànsha kakesè. Udi mudìshikàmìne. “Endèlaayi mu Bukènkè, mùdiYe mu Bukènkè, ne Mashi à Yesù Kilistò àdi

àtùkezula ku mpèkaatù yònsò, ne tudi mu bwobùmwè muntu ne mukwèndè.” Ki bwalu mbwòbù abu’s.

109 “Ewu udi munda mwèbè mmunène kutàmba ewu udi mu buloba.” Mpindyewu, wèwè mutàngile paanyimà ne mwikàle mupìishiiibwe, díbà adi ucidi ànu mu buloba. Kàdi wèwè ne mwoyi kumutù kwà cyòci aci, díbà adi Ewu udi munda mwèbè awu mmukulombòle kumutù kwà mídima.

Ànu mùdì mbata amu, yèyè ùdi kumutù kwà mídima yà bitoci. Yèyè ùdi kumutù kwà mídima yà màyi à bitoci. Yèyè ùdi mu bukènkè, ùleeja bulenga bwà kwisù bìvwà butèekiibwe munda mwèndè kumpàlà kwà kuumukayè mu bitoci. Amen.

110 Mpindyewu ndi—ndi ndyùmvwà bu mwena Kilistò wa wèla mbilà. Cìvwà cisanganyiibwa muntwamu kùdi Nzambi, ku cibangidilu, cyàkadisebela njila, ne kucimuna. Cyàkacimuna cizubu. Cyàkacimuna bitoci. Cyàkacimuna màyi. Cyàkacimuna byònsò, ne cìvwà cìcimunyi, ne cìvwà cìleeja bulenga bwà kwisù ne Butùmbì bwà Nzambi.

111 Mùshindù awu ke ùdi mwena kwitabuuja yònsò wèza. Mùshindù awu ke wàkenza Noà. Mùshindù awu ke wàkenza Lotà. Ki mùshindù ngwòwò awu. Tàngilàayi numòne ne mmu bukooya kaayi mùvwàye ùsanganyiibwa. Mùshindù awu ke wàkenza Mòsà. Mùshindù awu ngwàkenza Yoshùwà. Mùshindù awu ngwàkenza Danyèlè. Mùshindù awu ngwàkenza Shadràkà, ne Meshàkà. Mùshindù awu ngwàkenza Yone Mubàtiji; Zakàayi, Elizàbèetà. Mùshindù awu ke ùvwà Simèonà, mùshindù awu ngùvwà Anà, yònsò wa kùdìbo mwenzè. Bàakacimuna bitoci bìvwà mu nyùngulukilu wàbò ne bìvwà munda mwàbò abi. Kubàndishabò mutù kumutù kwà cintu aci, ne kukenkèsha Butùmbì bwà Nzambi. Ki cìdì mwena Kilistò mulelèlè wèza ncyòci aci.

112 Vùlukàayi ne, Yesù wàkaMuleeja mwà kucyenza. Matùkù makùmi ànaayi à diteeciibwa, Yèyè wàkateeciibwa kutàmba muntu kanà yònsò uvwakù mufwànyine kuteeciibwa awu, mu diteeciibwa dyà Yesù Kilistò. Tàngilàayi. Yèyè mmutùleejè mwà kucyenza.

Mpindyewu nèngìmanyikè, ànu mu tusunsa tukesè cyanàanà.

113 Tàngilàayi. Yèyè mmutùleeje mwà kucyenza. Yèyè wàkacyèza bishi? Ku Dìyi. Mùshindù awu ke wàkacyèzàYe, bwalu Yèyè ùvwà Dìyi. Ne Yesù wàkamba ne: “Nwènù bashààle munda Mwànyì, ne Méyi Àànyì munda mwènù,” nudi nwalukila cyàkàbìdì ku Dìyi, Dìyi dyà mulayi. Dìyi dyà mulayi kùdi mwena Kilistò yònsò ncinyi? “Ewu udi munda mwènù mmutàmbe ewu udi mu buloba bunène.” Díbà adi mmunyi mùndì ncimuna? Kì mmèmè to, kàdi Dìyi dìdì munda mwànyì. Dìyi dìdì Nzambi. Pashìshe mèmè ngàcimunu bintu byà pa buloba, bwalu n’Dìyi dìdì munda mwànyì. “Nwènù bashààle munda Mwànyì, Méyi

Àanyì munda mwènù, díbà adi nùlombè ànu cinùdi baswè aci.” Tùngunukà wèwè ànu ne kukolesha. Ukàadi uya mutàngile kuulu, cyà bushùwà ànu bu cintu kanà cyònsò eci. Nwamònu anyi? Bìkèngela ùfikè kuulu aku.

114 Matùkù Èndè makùmi ànaayi à diteeciibwa, ku Díyì dyà Nzambi Yèyè mmucimùne. Ndi muswè kwamba cintu kampànda kaaba aka ànu bwà katanci kakesè cyanààna. Sàtaanà wàkaMubùcikila misangu minène isàtù mu diteeciibwa adi. Tàngilàayi. Bidi misangu yònsò ànu mu àsàtù awu. Kanùcipùku mwoyi to. Nwamònu anyi? Yèyè wàkenza dibùndula misangu minène isàtù, kuumukila ku dyà ditàmbe kutùmbuka too ne ku dyà ditàmbe kupwekela. Wàkateeta ne mwèndè mwònsò bwà kuMucimuna. Kàdi Yèyè ùvwa Díyì. Amen. CyàkenzàYe naaci mudimu ncinyi? Yèyè mwinè, Díyì. Mabùndula àsàtù manène à Sàtaanà anyi mabùcikila pambidi Pèndè, kàdi Yèyè wàkatwilangana naaci ne Díyì. Dibùndula dyònsò, Yèyè ùvwa mwà kudyenza ne Díyì. Tàngilàayi eci mpindyewu, kuumukila ku ditàmbe kutùmbuka too ne ku ditàmbe kupwekela.

115 Cyà kumpàlampala cyàkabùndulàye naaci, mbwà àkwàta mudimu ne bukolè Bwèndè bunène. Bwalu, Yèyè ùvwa mumanyè ne Yèyè ùvwa Díyì. Ùvwa mumanyè kaaba Kèndè. Nudi nwtabuuja ne Yèyè ùvwa mumanyè anyi? “Mèmè Mwànà wa muntu.” Ùvwa mumanyè kaaba Kèndè. Ki Sàtaanà kulwa e kujinga bwà Yèyè kukwàta mudimu ne bukolè Bwèndè Yèyè mwinè pambidi Pèndè, bwà kuMudiisha, muswè kuDidiisha. Ùvwa ne nzala. Muntu yèyè ne nzala, ùdi mwà kwenza ní ncinyi ní ncinyi kanà cyònsò. Ùdi mwà kwiba, kunyenga, kulòmba kàà luse, kusomba, kwenza cintu kanà cyònsò. Nwamònu anyi? Yèyè ùvwa ne kazala aku. Ne Sàtaanà wàkakwàta mudimu ne dibùcikila dyèndè ditàmbe bunène dyà kumpàla pambidi Pèndè, bwà kwangata bukolè Bwèndè bùvwàYe mupèshìibwe bwà kucimuna naabù ne kukwàta naabù mudimu pa Yèyè mwinè. Kààkakwàtakù naabù mudimu pa Yèyè mwinè to. Wàkakwàta naabù mudimu pa bakwàbò. Ncyà bushùwà. Wàkakwàta naabù mudimu pa bakwàbò, kí mpa Yèyè mwinè to. Kabùvwa Bwèndè Yèyè to. Nànsha nànkù, Yèyè’s ùvwa mufwànyine kwikala mucyènzè. Ncyà bushùwà ne Yèyè ùvwa mufwànyine kwikala mucyènzè.

116 Kàdi nudi numòna mùdi dyabùlù wenza anyi? Dyabùlù mmuswè bwà nwènù kumucyùka. Yèyè wàkacyùka ànu ku cìvwà Taatù mwambè bwà kwenza aci. Ncyà bushùwà.

Yèyè ne: “Mòna’s,” mwàkambà Sàtaanà, “bààkafùnda ne: ‘Yèyè neàtùmine Banjèlò díyì. . .’”

117 Yèyè ne: “Èyowà’s, kàdi’s bààkafùnda kàbìdì. . .” Nwamònu anyi? S’ki bwalu mbwòbù abu. Nwamònu anyi? Yèyè ùvwa mumanyè ne Yèyè ùvwa Nganyi. Sàtaanà ùvwa mumanyè. . .

Meeji àdi àya mu ndòndò kutàmba mùdìWu mafùnda. Nwamònu anyi? Ndisonso diibwa. Mùsà ùdi munda mwàWù amu, nudi numòna's, cidiCi menemene.

<sup>118</sup> Nànsha mùvwàYe mufwànyine kwikala mucyènzè amu, Yèyè kàakacyènza to. Kàdi Yèyè—Yèyè kàakatèyakù ntèmà ku bìvwà Sàtaanà ùleeja to.

Mpindyewu, cintu cimpè ncyôci eci. Nwamònu anyi? Míngà misangu Sàtaanà ùdi mwà kukwangata, ne paùdi wela meeji ne udi wenza diswa dyà Nzambì, ne ùdi mwà kukuleeja cyà dyenza, neucyupùkile. Èyowa's, mukalenge. Ncyà bushùwà ne ùdi mwà kucyènza.

<sup>119</sup> Mpindyewu twánjàayi kwangata, cileeji, bu mùdi bàna bèètù bàà bakàji. Mbalenga be. Ne yèyè ùdi mwà kukufikisha pa kaaba kampànda, kàà ne, udi ulekela nsuki yèbè yileepa, kùvwa mumanya ne yìvwa yìkulengeja bikole to, nènku, katanci aka, upetakù meeji kampànda makesè à dyambu, mwikale ndambù kumutù kwà muntu kampànda mukwàbò. Bàmwè bàà kunùdi nwènù balùme, nudi bamanyè cìndi nswa kwamba aci. Nwamònu anyi? Nènku yèyè ùdi mwà kwangata cintu cimwècimwè aci kàdi kukuleejaci. Ncyà bushùwà. Nwamònu's. Bikèngela bwà wèwè kucìcimuna.

Vùlukàayi ànu ne, wèwè udi ne mwoyi bwà Nzambì. Udi ne kiipàcìlà kàmwèpelè, ne kiinè aku n'Yesù Kilistò. Pa kuumusha aci, kakwèna cintu cikwàbò nànsha cimwè cidi ne musinga to. N'Yèyè. Dìbà adi, ciibìdi, bwà dikhù dyèbè. Pashiishe, ciisàtù, bwèbè wèwè mwine. Kàdi, dyàmbedi, Nzambì; cidi cìlonda, ndikhù dyèbè; ne cidi cìlonda, ng'wèwè. Wèwè udi nombà mwisàtù; ki ndekeelu wa njila nyèyè awu. Ditèèke wèwè mwìnè wa ndekeelu; Ki cyàkenza Yè.

<sup>120</sup> Tàngilàayi cìvwàYe mwà kwikala mwenzè. Yèyè ne: “Ndi mufwànyine kubiikila Taatù Wanyì, kwakula Nendè, Yèyè ùvwa mufwànyine kuNtumina buludi bisumbù dikumi ne bibìdi byà Banjèlò.” Pàvwàbi ne, umwèpelè wa ku Bwòbò s'ùvwa mwà kubùtula buloba. Yèyè ne: “Bu ne Bukalenge Bwànyì bùvwa bwà buloba ebu, dìbà adi's bantu Bàànyì bàvwa mwà kulwangana mvità. Kàdi Bukalenge Bwànyì mbwà mu Dyulu.” Ki bwalu mbwòbù abu's. Nwamònu anyi? Yèyè's ùvwa mufwànyine kwikala mwenzè cyôci aci, kàdi Yèyè kàakacyènza to. Nwamònu anyi? Nànsha nànkù, Yèyè's ùvwa ànu mufwànyine kwikala mucyènzè. Kàakatèelejaku dimuleeja dyà Sàtaanà to.

<sup>121</sup> Mpindyewu, nukàadikhù bumvwè bantu bàmba ne: “Wèwè—wèwè mwitàbùùje ne kùdi—kùdi mwondopi wa kùdi Nzambì. . . Wèwè mwikàle mwondopi wa kùdi Nzambì. . . Ndaaku ùkàngàte mwondopi wèbè wa kùdi Nzambì awu. Ndi ne muntu lwà mwaba ewu, ùsaama. Ndi muswè kumumòna umwondopa's.” Nwamònu démon umweumwe awu anyi? Ùdi munkaci mwà kuteeta bwà kukuleeja byà dyenza. Ùdi uteeta bwà kukufikisha ku



dimutèeleja yèyè pamutù pàà kutèeleja Nzambi. Kàdi musadidi mulelèlà, wa bushùwà wa Nzambi neatèeleje bwà kumòna cidi Taatù wàmba, dyàmbedi. Nwamònu anyi?

<sup>122</sup> Bu mwànà mukesè wa mu dibòkò wa Stadskev, pààkatùmàbo mukenji kaaba aka apu. Ki Màndàmù Stadskev kwambayè ne: “Mwanèètù Branham, mémè’s ndi mubiikidile ku Allemagne.” Kùvwa cilwilu cyà beena Àmèrikè, ne kàmwè kàà ku ndèkè yàbò yà jets misòmbe kaaba aka mu cipalu, mufwànyine kupaapala kuya naanyi ku Allemagne ne kwalukila, mu ditùkù dimwè. Yèyè ùvwa muyiishi wa mu bàsàlaayi. Nènku mwànà awu ùvwa mulàadika paanshi, mufwè. Ki maamù mutekète awu wela mbila mikolè, kwambaye ne: “Tèèleja!” Yèyè ne: “Ndi mumanyè. Mvwa mwimane mwaba awu ne mumòne mukàji awu mwambùle mwànà mufwè awu mu mabòkò èndè, wàkafwà mu dindà adi awu. Mémè kumòna Mwanèètù Branham ùpàtuka mwaba awu, ùtentekela mwànà mufwè awu byanza, ne kwalukilayè ku mwoyi.” Yèyè ne: “Ewu mmwanàanyi wa mu dibòkò, Mwanèètù Branham.” Kacya kakùvwakù kwanji kubwela lufù mu díkù dyàbò to. Nwamònu anyi? Mwànà mukesè ewu kusaamayè mu dindà kampànda e kufwàye mu mapingaja amu.

Ki bantu mwab’awu biimàne banyùngùlùke, munkaci mwà kufila bipròfeta ne bikwàbò, “Mwànà awu neàbiike ku lufù,” ne byònsò byà mùshindù awu abi.

<sup>123</sup> Mémè ne: “Èè, abi’s mbilenga byà dikèma, Mwanèètù wa bakàji Stadskev. Kàdi lekèlaku mmonè cidi Taatù wàmba aci.”

Mémè kupatuka kuya mu diitu amu. Ki mémè kusambila. Mémè kwalukilamù; yèyè ùkaavwa mumanè kubìikila misangu yìbìdì anyi yìsàtù kumpàla kwà mémè kwalukila mu dindà dyàkalondà adi. Cintu nànsha cimwè.

Ngàngàbukà kwambayè ne: “Èyo.” Yèyè ne: “Byòbì nànkù, wèwè ne diitabuuja dyà mùshindù awu, inàbànzà, twètù katwàdyàkulekelaku mwànà wa mu dibòkò awu ùmuka mu lùpitaadi to. Mulekèlaayi mutèeka ànu kaaba aka. Shààla wèwè ànu nendè kaaba aka. Bìdì ànu bìmpè.”

Mwanèètù Stadskev wàkaya e kumònaye munène wa cilwilu. Kwambabo ne: “Bushùwà. Netùbuuke tùye nendè, ne netùmwalùjè.”

<sup>124</sup> Nènku kùvwa ndèkè musòmbe, mwindile, bwà kuya naanyi mu dindà adi ne kungaaluja dilòòlò adi, ku Allemagne, ku Heidelberg, mu Allemagne, bwà dibìshiiibwa dyà mwànà ewu. Mémè ne: “Bushùwà’s, Nzambi ùdi mwà kucyènza, kàdi tùmònàayiibì cidi diswa Dyèndè.”

<sup>125</sup> Pashiishe mémè kupàtuka, kusambila bufùku bujimà. Kakwàkenzeka cintu nànsha cimwè to. Mémè kwalukila pàakacyabu mu dindà; kakwàkenzeka cintu nànsha cimwè. Ki mémè kubwela mu cibambalu amu. Ànu díbà adi mémè

kutàngila kwàka, ne ki Bukênkè abu bwimàne mwaba awu mu ciibi amu. Yèyè ne: “Kùlengi aci to. Kucitàndishi to. Aci ncyanza cyà Nzambì.”

<sup>126</sup> Mémè kumubiikila ku tèlèfonè. Mémè kwamba ne: “Mwanèètù wa bakàji Stadskev, jiika mwanèèbè wa mu dibòkò awu. Ncyanza cyà Mukalenge. Ndiswa dyà Nzambì. Cintu kampànda ncifwànyine kwenzekela mwànà awu paanyimà pàà matùkù. Wèwè mulekèlè àye ànu kùdì Nzambì mumanye mwaba ùdiye aku. Udi mwà kuya kùdiye aku mpindyewu. Yèyè mushààla ne mwoyi, kwàkukuya to. Wèwè mulekèlè ànu nànkù.”

<sup>127</sup> Muiishi munène wa ba-Luthériens awu mu Allemagne kufundaye mukànda wàmba ne: “Mùshindù mwine wùndìku mwà kwanyisha, mùdì, Mwanèètù Branham mwindile dipangadika ditòoke tòò dyà kùdì Nzambì adi, kumpàla kwà kwambaye ní ncinyi cyònsò.”

Ki cyòci aci. Shààlaayi bakwàte ku dipangadika dyà Nzambì. Nànsha bakwàbò bàmbe cinyi, anyi ní ncinyi cyònsò cidìku aci, kùpecyanganyikù ne Sàtaanà to, nànsha kakesè.

<sup>128</sup> Sàtaanà yèyè wàmba ne: “Mpindyewu, dibàtiiza dyà mu màyi, dìnà dyà “Taatu, Mwànà. . .” Byòbì nànkù, yèyè ùdì ànu ùkuleeja, wèwè cilekelè kwà tálàlà. Nzambì mmwámbe mùshindù mukwàbò. Yèyè mwambè ne: “Wèwè udi muntu mwímpè, kabyèna bikèngela bwà wèwè kwikala. . . Udi mukàji mwímpè, kabyèna bikèngela bwà wèwè kwenza. . .” Kubitéelejikù to. Dìyi dyòdì dyàmba cintu cishìilàngàne, wèwè shààla ne Dìyi nànsha cyòci ciikàle cinyi. Aci’s ke cileejilu cidì Yesù ùkupèèsha, nènku ke dibùcikila dinène adi, nwamònu’s, dyàkaMubùcikilàye naadi.

<sup>129</sup> Pashìishe, dibùcikila diibìdì. Nèndwìjakaje. Bìdì bìmwènèka ànu bu ne dìbà didi diya lubilu lukolè be. Dibùcikila dinène dyàkalondà, dyàkaMubùcikilàye naadi, òvwà bwà Yèyè kwikala mwena madìleeji.

Kàdì mùshindù ùtu aci cilenga basadidi bàà Nzambì’s, bwà kwikala beena madìleeji’s, bwà kuleeja cyùdì mwà kwenza’s. “Butùmbi kùdì Nzambì’s wè! Àlèluuyàh! Mémè ndi musungidi! Mémè ndi *cikampànda*.” Nwamònu anyi? Nwamònu anyi?

<sup>130</sup> “Bànda kùneeku, ku lusongo lwà ntempèlù eku, ne sòmbelà kaaba aka.” Yèyè wàkaMuteeta bwà kucyènza. Mpindyewu, vùlukààyi ne, Yèyè wàkateeciibwa bwà kucyènza, bikolè. Yèyè ne: “Mpindyewu, Wèwè muswè kwikala cintu kampànda kumpàla kwà bantu, imànyina kuulu kwà ntempèlù ewu, ùtùpìke.” Nwamònu anyi? “NènKupèèshè Mufundu bwà bwalu abu, bwalu bàakafùnda ne: ‘Yèyè neàtùminè Banjèlò dīyi bwà bwalu Bwèbè, bwà ne, dībà nànsha dīmwe, kulù kutuuta dikàsà ku dibwe nànsha. Yèyè neàKwambwile muulu.’” Bwà kuMuvwija mwena madìleeji, bwà kuleeja bukòokeshi Bwèndè.

131 Musadidi mulelèlè wa Nzambi kàtukù wènza aci to. Panùdi numòna muntu ùdileeja, cyàdi citàdika, ne byònsò mùshindù awu, vùlukàayi ànu ne, kùdi cintu kampànda cibì mwaba awu. To. Nzambi kàtu muswè abi to. Yesù wàkafila cileejilu. Ùvwa mufwànyine kwikala mucyénzè. Ncyà bushùwà ne Yèyè ùvwa ànu mwà kwikala mucyénzè, kàdi Yèyè kàakacyènza to. Kakùtukù musadidi wa Nzambi nànsha umwe mwikale mwena madileeji, mu yèyè mwinè, bwà kuteeta kwangata bukòlè bwà Nzambi bwà kudileeja mùdiye mutàmbe muntu mukwàbò to.

132 Nudi bavùlukekù ne Mòsà wàkenza nànkù anyi? Nudi bacivùlùke anyi? Nzambi wàkamupa bukòlè bwà kwenza cyònsò civwàye muswè kwenza aci; kumuvwija mupròfètà. Kupwekaye tamakatamaka too ne ku Lubwebwe alu, ne kutuutaye Lubwebwe alu musangu mwibìdi. Aci's civwa cibèngangana ne diswa dyà Nzambi.

Nzambi kwamba ne: “Akùlà ne Lubwebwe alu. Kùlùtuuci kàbìdi to. Wànyangàkàjì ci—ci—cimfwànyì cyònsò kaaba aka. Lubwebwe alu nelwikalè ànu ne cyà kutuuciibwa musangu wùmwe.” Kàdi yèyè wàkaakula bwà butekètè bwà Dìyì pààkenzàye cyòci aci; Aci kacivwà cikumbàne to. Èyowà. Dìyì ke divwà munkaci mwà kutùngunuka. Lubwebwe alu lùvwa Dìyì. Nwamònu anyi?

133 Yèyè, musangu wà kumpàla, wàkatuuta Lubwebwe ne màyi kupàtukawù. Ki pashìshe kupetabò nyòotà cyàkàbìdi. Yèyè ne: “Mpindyewu alùkilà wàkule ne Lubwebwe.” Lwàkatuuciibwa ànu musangu ùmwè cyanààna. Nwamònu anyi?

“Dipanga kukùmbana dyà Dìyì,” Mòsà wàkafila bujaadiki abu. “Dìyì kadivwa mu dyòdi to; byàkakèngela bwà kutuuciibwa Yè cyàkàbìdi.”

134 Ki Mòsà kupwekayè kuntwaku ne kutuutayè Lubwebwe alu mùshindù awu, kwambayè ne: “Pàtukà!” Kaàkapàtuka to, ki yèyè kulùtuuta cyàkàbìdi, ne kwamba ne: “Pàtukà! Ndi nkutùmina dìyì bwà wèwè kupàtuka.” Ki màyi kupàtukawù.

135 Nzambi kwamba ne: “Banda kunweku. Lwàkù kunweku. Udi muditùmbishe. Wèwè kwangata bukòlè Bwànyì; pamutù pàà kuNjidila Mèmè, wèwè kudijidila wèwè. Mpindyewu kwèna uya mu buloba amu to. Tàngilà kuntwaku, ùbùmònei; kàdi, mwaba ewu, wèwè neùshààdile ànu mwaba ewu.” Kaa, ekelekèle! Kacya kakùtuku kwanji kwikala muntu bu Mòsà to, nudi bamanyè's. To, to.

136 Pààkafikàye ku madileeji awu ne Yesù, kwambayè ne: “Bànda pamutù pàà ntempèlu ewu kàdi ùtùpikè.”

137 Yèyè ne: “Bààkafùnda ne,” amen, “Kuteeci Mukalenge Nzambi webè nànsha.” Nwamònu anyi? Wàkatwilangana nendè ne Dìyì, mu cyòci aci, ne dibùcikila dinène dyònsò.

138 Musadidi mulelèlè nànsha umwe kàtukù mwanji kuteeta kudileeya yêyè mwinè, ne—ne bukolè bwà Nzambi to. Yêyè wenza nànkù, ùdi ùjìmija ànu mwaba awu mene.

139 Dibùcikila diisâtù dinène, Sàtaanà kufila bwà kuMulambula bukalenge ebu. Ke cyàkenzaye. Sàtaanà wàkamba ne: “Udi umòna makalenge à pa buloba aa anyi? Nngàanyi mémè. Ndi ngèna naawù cyònsò cìndi muswè aci. NènKupèèshèwu.”

Kàdi, nudi bavùlùke ne, yêyè ùvwa ùteeta kuMufikisha ku diàngata kakùyì nkùrusè to. Bu Yêyè mwènze nànkù, nùnkù's tudi bajimine. Yêyè's ùvwa mwà kwikala mwangàte bukalenge. Kàdi Ùvwa ne cyà kulonda... Ùvwa ne cyà kwalukila. Kàdi, Wàkateeciibwa bwà kucyènza. Lufù ncintu cikolè. Wàkateeciibwa bwà kwangata budìshikaminyi Bwèndè ne kwikala Mfùmù wa buloba, kàyì ùpìcila ku nkùrusè to. Kàdi, bu Yêyè mucyènzè, nùnkù's bantu Bèndè mbafwè. Sàtaanà's ùvwa mufwànyine kwikala muMupèèsheci ne disànkà dyònsò. Kàdi kwambaYè ne: “Nkàtùkile mwaba ewu, Sàtaanà.” Yêyè kàakacyènza to.

140 Wàkalwa ne kukèngayè, ne kwangata njila mukolè, ne mupapàkàne awu. Yêyè wàkangata njila wa dikèngeshiibwa. Wàkangata njila wa lufù.

Twètù aba, mu dindà emu, tudiku baswè kwenza nànkù, kwangata njila umweumwe wakangataYè awu anyi? Tudiku baswè kufwà anyi? Tudiku baswè bwà kudifila kùdi Nzambi, kulekela maalu wònsò à pa buloba ne bintu byònsò, bwà kuMukwacila mudimu anyi? Nwamònu anyi?

141 Mpindyewu, Yêyè's wàkabènga kubwàngata. Ne budìswilè bwònsò bwà—bwà kubufila, Sàtaanà, s'wàkabùfila kùdiYe. Kàdi Yêyè kàakabwangata to. Nànsha mwàkateeciibwà Yesù amu, Yêyè wàkatùcimwina. Yêyè—Yêyè wàkiitaba mateeciibwa wònsò bwànyì mémè ne bwèbè wèwè. Nwamònu anyi? Yêyè's ùvwa mufwànyine kwikala mubwàngate dîbà adi mene. Kàdi cyàkangacilàYe njila mukwàbò awu ncinyi? Bwà twamòna mwà kulwa, kwikala Nèndè. Nènku pìikalàbi ne Yêyè wàkafuta mushinga bu nànkù, dîbà adi mmunyi mutwàtàmba kushàadila bwà kubenga kuwàkidila? Pààbi, vùlukàayi ne, kakwèna cintu nànsha cìmwè cyà mushinga kaaba aka to, twamb'eku twamb'eku.

142 Pawikalà ne mwoyi bidimu lukàmà, newikalè mwà kufika ku cinyi? Meeji à mu mutù mafwè, ne meeji èbè mayè, mubidì mujimà mutekètangane, ne mukulàkàje ne uzakalala. S'ke kûyaaya mutàngile aku, ne s'ki ndekeelu awu. Lwàku mpindyewu, ùcimune cintu aci. Udi ucyènza bishi? Ku Dìyì. Cidì Dìyì dyàmba aci, ùcyènzè. Endà mudìpwekèshe. Ikàlà ne mwoyi kumpalà kwà Yesù.

143 Yèyè wakiitaba bintu byònsò bwèbè wèwè ne mèmè. Yèyè ki cileejilu cyètù cyà mùshindù wà kucimuna lukòngò lwètù lubiipe elu, mwàkacimunaYe lukòngò Lwèndè lubi alu.

144 Vùlukàayi ne, pàakalwàYe pa buloba, kùvwa bupidyà ànu búngì bwà, anyi bupite, búdiku mu cikondo kanà cyònsò. KabyàkaMutàcishakù nànsha kakesè to. PààkaMubiikilabo ne ndémon pamutù pàà Nzambi, pààkaMwinyikabo cintu kanà cyònsò civwa cifwànyine kwikalaku aci, kabyàkaMutacisha nànsha kakesè to. Yèyè ùvwa ne kiiipàcìlà kàmwèpelè: “Kutùmikila Taatù. Kulama Dìyi.” Dìyi dìdì Nzambi. Ùvwa ne meeji àmwè.

145 Tutu misangu mikwàbò tuteeciibwa bwà kwalukila cyànyimà. Bààbúngì bàà kunùdì, mbateeciibwe bwà kwalukila ku òngumba, kwalukila ne kuditwamù, bwalu buloba bujimà bùdì bwàmba ne: “Udi wa mu òngumba kaayi? Udi muswikàkàne ne èkèleeziyà kaayi?” Tudi bateeciibwa bwà kwenza nànkù; twètù bwònsò. Bàà bèètù bàà bakàjì mbateeciibwe bwà kwalukila, kwalukila ne kushààla bàà mu èkèleeziyà mikwàbò yònsò eyi, ne yimwè Assemblées, anyi èkèleeziyà yà Nzambi, anyi yimwè yà ku yòyi; cikolà biikàle ànu beena Mpenta, kulekela nsuki yèbè mikosa, ne kuvwàla ànu mùshindù wònsò wùdì muswè awu. Nwamònu anyi? Udi muteeciibwe bwà kwenza nànkù, kwalukila ne kwikala mumanyike kùdì lukòngò lwà beena lwonji lutùdimu ne mwoyi elu.

Pìnè apu mpàdì, eci cikàle mpèkaatù munène wa matùkù ètù aa. Mmpèkaatù munène munkaci mwà bantu bèètù, ncyena maalu àà yà pa buloba, bu mùdì Bible mwàmbè ne Cikondo cyà Laòdì- . . . Laòdikiyà civwa nànkù. Cyòci’s ncyà maalu à pa buloba: “Cibanji, kaciyi cikèngela cintu nànsha cimwè to; kaciyi cimanyè ne cidi butakà, cyena dikèngà, cikèngeledi cyà luse, ne cifofo to.” Ki mpèkaatù wa ditùkù dyètù nyèyè awu. Paùdì umvwa Dìyi dyà Nzambi dicipiisha, dībà adi udi wangata njila mukwàbò awu, kwènà mumanyike pàmwè ne bàà pa buloba to. Udi uteeciibwa bwà kwalukila.

146 Ndi mumanyè. Nudi batùngunuka ànu ne kungambila. Ndi mumanyè ne nwènù nudi nwamba ne: “Dībà dyònsò.” Ndi mumanyè ne nudi nuncyòka pàndì nkobola bintu ebi bu musambu. Ndi ncyòka pa kunùmòna nucyènza, mèmè pàanyi, ncyà bushùwà, nwenza mpèkaatù ùndì nteeta kunwambila ewu. Wèwè udi wamba ne: “Cyùdì utàmba kukobwelapù ncinyi?” Lekèla dimwenza, dībà adi. Ndi nteeta bwà kusùngila mwoyi wèbè, ku Dìyi. Ndi mucyòke, mèmè pàanyi’s. Pa nànkù, olòlòka ànu cyanààna. Eci’s mmpèkaatù, kabivwa bikèngela bwà kwenjiibwaye to. Èyowà’s, mukalenge.

147 Bidi bikèngela bwà twètù kucimuna bintu ebi. Tudi tutèkemena diteeciibwa kùdibi, kùdì maalu àà pa buloba.

“Wèwè munange buloba, bintu byà pa buloba, dinanga dyà Nzambì kadyènà munda mwèbè nànsha,” mwàkambà Yesù.

148 Mpindyewu netùjikije, kàdi ngàmbèku nùnku. Kùdi difutu bwà mucimunyi.

149 Lekèlaayi nñubadileku cintu kampànda mwab'ewu. Buulùlaayi Bibles yènù. Twàlukilàayi ku Bwàkabuulwibwà, mu nshapità mwi3, nshapità mwi2. Tàngilàayi apa mpindyewu, bintu byònsò bímvwà ngàakula abi, bwà kucimuna. Mpindyewu ditàngile ànu wèwè nkaàyeebè umòne's. Dikenkète wèwè mwinè mu lumwenu lwà nyumà, umòne ní udi mucimune.

150 Mpindyewu, mukenji wà kumpàla, bwà—bwà mwanjèlò wa Efèsò, ndi muswè nùtèèlejè cidiYe mwàmbè. Ne Bwàkabuulwibwà, nshapità mwi2, mvensà wa 7. Eci cidi bwà cikondo cyà èkèleeziyà aci, pàakabàmbilàYe bwònsò cìvwàbo benzè ne: “Mbalekèle dinanga dyàbò dyà kumpàla.” mvensà wa 7:

*Ewu udi ne maci, ùmvwè cidi Nyumà wàmbila maèkèleeziyà; Kùdi ewu (muntu awu, kî ng'èkèleeziyà to) . . . Ewu wàcimuna—wàcimuna mèmè nèmmpupèeshè bwà kudyàye ku mucì wà mwoyi, ùdi munkaci mwà mpàlàdiizò wa Nzambì awu.*

Nwamònu anyi? Bacimunyi bàà mu Efèsò.

151 Mpindyewu, cìvwà cilondà cìwva n'Seemùnà. Mpindyewu, bwà bacimunyi bàà mu aci, twanji tutèèlejàayi eci. Mpindyewu, mvensà wa 11.

*Kùdi ewu—ewu udi ne maci, ùmvwè cidi Nyumà wàmbila maèkèleeziyà; Ewu wàcimuna kàakukèngeshiibwa kùdi lufù lwibìdì to.*

Nwamònu anyi? Bààkalùcimuna.

152 Mpindyewu, aci, mpindyewu tàngilàayi ku Peegàmò, netùjandulè cìvwàbo bashiile mucimunyi awu, mu cyòci eci. Netùbalè mvensà wa 17, kùdi èkèleeziyà wa Peegàmò.

*Ewu udi ne maci, . . .*

Aci, awu's mmuntu-nkààyà, kî ncisumbu cijimà to. Muntu-nkààyà, kî Mukàji-musèla udi upàtuka awu, nudi numòna's, Èkèleeziyà.

*Ewu udi ne maci awu, ùmvwè cidi Nyumà wàmbila maèkèleeziyà; Ewu wàcimuna mèmè nèmmpupèeshè bwà kudyàye manà masokoka awu, ne nèmmpupèeshè dibwe ditòoke, ne mu dibwe adi mwikale dìnà dipyadipyà difunda, didi muntu nànsha umwe kàji mumanyè to pa kuumusha ewu udi udìpeta awu.*

Aci's mbwà mucimunyi, wa cikondo cyà èkèleeziyà.

153 Mpindyewu, cidi cilonda n'Twatilà. Tùjandulàayi cìvwà naaci mucimunyi mu ditùkù adi. Twàngatàayi mvensà wa 26.

*Ne ewu wàcimuna, ne kulama byenzedi byànyì too ne ku ndekeelu, yéyè némupèèshe bukòokeshi kumatù kwà matùnga: (Aci's mbulelèlà.)*

*Nénku . . . neàkòokeshè ne dikombo dyà cyamù cifiike; ne bu dibungù dyà diima nebàbòjùbwe mu tusùnsukila: ànu mene mungàakacyàkidila kùdì Taatù wanyì.*

Nwamònu's: "Pàmwè Nendè, mu nkwasà Wendè wa butùmbi." Bidi bikèngela bwà Kilstò àkookeshè matùnga, ne dikombo dyà cyamù cifiike. Kàdi's ki Èkèleeziyà uvwa mucimùne awu: "Musòmbe mwaba awu, pàmwè Nendè, bwà kubòza matùnga ne dikombo dyà cyamù cifiike."

<sup>154</sup> Mpindyewu tùyaayi naabò ku èkèleeziyà wa Sàadi. Mpindyewu mvensà mwi5 wa nshapità mwi3.

*Ewu wàcimuna, yéyè neikale muvwadika bilàmbà bitòòke; ne ncyàkukùpula dìnà dyèndè mu mukàndà wà mwoyi to, kàdi nènjikulè dìnà dyèndè kumpàlà kwà Taatù wanyì, ne banjèlò bàà cijila.*

Aci mbwà mucimunyi wa mu Sàadi.

<sup>155</sup> Mpindyewu, twàngatàayi mpindyewu mvensà wa 12. Mpindyewu, eci cidi bwà èkèleeziyà wa—wa Filàdèlèfiyà, mu mvensà wa 12.

*Ewu wàcimuna némuvwije dikunji mu ntempèlu wa Nzambi wanyì, ne yéyè kàakupàtukamù kàbidì to: ne mèmè nèmfundè dìnà dyànyì pambidi pèndè, dìnà dyà Nzambi wanyì, ne dìnà dyà cimenga cyà Nzambi wanyì, cidi Yelusàlèma mupyamùpyà aci, udi utùlulukila mu dyulu ùfùmina kùdì. . . Nzambi, ne nèmfundè dìnà dyànyì dipyadipyà pambidi pèndè.*

<sup>156</sup> Tàngilàayi cidi cilaya mucimunyi's. Nwamònu anyì?

Mpindyewu, mpindyewu Laòdikiyà, s'ki cikondo cyà ndekeelu cyà èkèleeziyà ncyòci aci. Nekwikalè bàmwè bàcimunyi. Tàngilàayi apa. Bwòbò, nwavùlukaayi ne, cikondo cyà èkèleeziyà cyònsò, cidi cicyànyidila aci cidi cipyàna byònsò bivwa bikwàbò abi bipèebwa. Tàngilàayi kùneeku. Mpindyewu, apa, mpaanyimà pàà bamanè kupeta makolè wònsò aa, mènà mpyamàpyà aa, ne byònsò byàkafundiibwa, byàkalayàYe, ne bàdyè manà masokoka, ne byònsò too ne ku ndekeelu. Tàngilàayi cikondo cyà ndekeelu cyà èkèleeziyà eci, Bwàkabuulwibwà 3:21.

*Ewu wàcimuna némupèèshè bwà kusòmbayè naanyì mu nkwasà wanyì wa butùmbi, (amen), ànu mùndì pàànyì mucimùne, ne musòmbe ne Taatù wanyì mu nkwasà wendè wa butùmbi.*

*Ewu udi ne macì, ùmvwè cidi Nyumà wàmbila maèkèleeziyà.*

157 Kùdi difutu bwà bacìmunyi. Wèwè mbata wa yààya, kolesha. Piikalàci munda mwèbè amu, tèeka bitoci ne bikwàbò byònsò ku luseke, ambuluja mutàngile kumutù. Èyowà's, mukalenge. "Bwà kusòmba Naanyi pa nkwasà Wanyi wa butùmbi."

158 Nudi bamanyè's, musangu kampànda, mamwèndè wa Yakòbò ne Yone... Katwàkwikala ne díbà dyà kucibala to. Mamwèndè wa Yakòbò ne Yone wàkalwa kulòmba kaaba aka. Nudi bamanyè nànkù anyi? Nudi bavùlùke bwalu abu anyi? "Mukalenge, lekelàku mwanàanyi wa balùme ewu àsombe ku luseke elu, ne wanyi mukwàbò wa balùme àsombe ku lukwàbò." Ki dijinga dyà maamù bwà mwanèndè wa balùme ndyòdi adi.

Kàdi tàngilàayi. Kàdi: "Mwaba awu," mwàkambà Yesù, "wùvwa mudyànjila kulongolola." Kiine kaaba aka kakàvwa kanji kwikalakù mu cikondo aci to. Bwà cinyi? Mònaayi. "Nebàkàpèeshe aba bàvwa bakàlongolwela." Cinyi aci? Ewu uvwa ne cyà kusòmba ku dyàbalùme, ne mukwàbò pabwìpì Nendè menemene, ùvwa ne cya kwanji kwikala mucìmunyi. Nwamònu anyi? Cìcìvwa ànu... Yèyè kwamba ne: "Ncyèna—ncyèna ngenza eci to. Ncyèna mwà kwenza eci to, kàdi necìfidiibwè paanyimà pàà diteeta dimane kulwa." Amen. Nwamònu anyi? "Ncyèna mwà kufila eci to. Kàdi paanyimà pàà diteeta dimane kulwa, nebàsòmbelè ku dyàbalùme ne ku dyàbakàji. Kùdi dimiinù didyànjila kulongolola didi munkaci mwà kwindila ciine aci kuntu kwàka. Necìfidiibwè kùdi aba bàvwa bacilaya. Necìfidiibwe kuntwaku, kàdi diteeta kì ndyanji kulwa to; ne, yèyè kì mmwanji kucimuna to." Nwamònu anyi?

159 Muntu uvwa ne cyà kwangata kaaba aka ku luseke lùmwe awu, ne mukwàbò bwà kuwàngata ku lukwàbò luseke awu, pabwìpì Nendè mu Bukalenge, kacivwa cyanji kufidiibwa to, nwamònu's, kàvwa mwanji kucimuna to. Diteeta adi kadivwa dyanji kumata to. "Nedimate mu matùkù àcilwalwà."

"Twètù mwà kukènga bwà Kilistò ne Dìyì Dyèndè, netùkòokeshè pàmwe Nendè, bwalu Yèyè ùdi Dìyì." Vùlukaayi ne: "Twètù bakènge bwà bwalu Bwèndè ne Dìyì Dyèndè, netùkòokeshè pàmwe Nendè, mu Dìyì Dyèndè."

160 Mònaayi. Yèyè, Cileejilu cyètù, wàkacimuna, ne pashìshe wàkabànda, paanyimà pàà Yèyè mumane kucimuna lufù, ifèrò, bubèèdi, ne lukita. Byònsò, Wàkacimuna. "Pashìshe Wàkabànda, ne wàkàkwàta bupika ku bupika, wàkàpèesha bantu mapà." Aci cìvwa n'Dipungila Dikùlukulu, ne bansantu bàà mu Dipungila Dikùlukulu bàvwa bacimùne abu. Bàvwa bindile Muntu wa bwena awu, kàdi bààkafwa kumpàla kwà Yèyè kufika kaaba aku. Kàdi pàakalwà Muntu ewu ne: "Kacyàkapangisha aba bàvwa balàale to." Amen. Kwèna mwà kujìmija, mu mùshindù nànsha wùmwe to. Kwikala ne mwoyi anyi kufwa, mbishìlàngàne ku cinyi? "Kacyàkupangisha to." Nwamònu anyi? Bàvwa bwòbò bindile aci.



<sup>161</sup> Nànsha Yobo kale wàwa, ùvwa mucindile. Kwambayè ne: “Ndi mumanyè ne Mupikudi wanyi ùdi ne mwoyi, ne ku matùkù à ndekeelu Yèyè neimanè pa buloba.” Ki muntu mwakàne awu, muntu mupwàngàne. Wàkalàmbula mulàmbù. Wàkenza cyònsò cìvwà Nzambì mumwambile bwà kwenza aci. Wàkacyènza ne kaneemu kààbùngi ne kaneemu kavulè. Yèyè ùvwa mupròfetà. Ki pashìishe Sàtaanà kulwayè mwaba awu, bwà kumuteetayè. (Ànu mùdiye ùlwa bwà kukuteeta amu.) Cyàkenzàye ncinyi? Wàkatùngunuka ànu ne kwimana mwaba awu.

Mukàjèndè mene kupàtuka, kwamba ne: “Cyùdi kùyi welela Nzambì mulawu ne kufwà mwinè ncinyi’s? Mòna muwènji ne luse byà bibi kacya wàsomba mwaba awu.”

<sup>162</sup> Yèyè ne: “Wèwè’s udi wakula ànu bu mukàji mukùtākàne.” Mpindyewu, yèyè kàākambakù ne ùvwa mukùtākàne to, kàdi wàkaakula bu mukùtākàne. Nwamònu anyi? Yèyè ne: “Wèwè’s udi wakula bu mukàji mukùtākàne.” Yèyè ne: “Mukalenge nguvwa mufile, ne Mukalenge ngwàngàci; Dìna dya Mukalenge dibèneshiibwè.” Wàkacimuna.

<sup>163</sup> Kucìmunayè cìvwà beena mutumba ne cyà kwamba aci. Wàkacimuna bìvwa bidimba byònsò byà èkèleeziyà, Bildad ne bwònsò abu, ne cyà kwamba abi. Yèyè wàkacimuna mwèpiskòpò ne cìvwaye ne cyà kwamba aci. Wàkacimuna kàrdinalè ne cìvwaye ne cyà kwamba aci. Yèyè wàkacimuna dīgumba, cìvwàbo ne cyà kwamba aci. Nènku wàkashàala ne dibingishiibwa dya Dìyi. Amen. Nànsha nàнку, byàkamulomba byònsò bivwaye naabi, nànsha mene ne bânà bèndè. Ùvwa ùdikwanya byùjà ne cipese cyà ciyooyi, musòmbelè pa cyòci eci, kàdi nànsha nàнку kucìmunayè. Kàdi ndekeelu wa byònsò pàakapita cikondo cinène cyà diteeciibwa, díbà adi mavuba kwalukila cyànyimà.

<sup>164</sup> Yèyè kutàngila ku kantu ne kantu kònsò kàà meeji. Kwambaye ne: “Kùdi ditèkemena mu mucì pafwafwàwu; ùdi wàlukila kàbìdi ku mwoyi. Ne dimiinu dìdi dimata mu buloba, dibola; dyàlukila ku mwoyi kàbìdi. Kàdi pàdi muntu ùlàala panshì ne ùkùula mwoyi; ùdi ùjìmina. Ne bânà bèndè bálwalwa, bânà bèndè bàà balùme, bwà kumupa lumù ne kumudila; yèyè kàyì ùcìmòna nànsha. Yèyè kàākubùka kàbìdi to. Kaa, s’ki yèyè awu. Mbwalu kaayi abu? Mémè ndi pàànyi dimiinu. Mémè ndi cikampànda, ndi ndimiinu, ne nènnye mu buloba. Ncyèna mwà kujuukaku kàbìdi to. Nènshaalèmu. Kaa, nsokokèku mu lukita, ndamèku mu mwaba musokòme too ne pààpità ciiji Cyèbè cicolè. Unkosèlèku cikondo ne undumbùlwishe. Bu mùdi mbwebwe yìpeluka, màyi àpelula dibwe.” Kaa, ki kutùngunukayè, wènda wàmba bintu byònsò ebi. Ùvwa mwà kumòna bileejilu byònsò ebi kuntwaku, cìvwabi byùmvwija. Kaa, kàvwa ànu mwà kucyùmvwà to.

<sup>165</sup> Nènku, Mwanèètù wa bakàji Rogers, udi muvùlùke

pângààkayiishà cyôci aci ku citâlù cyà Busty. Nwamònu anyi?

<sup>166</sup> Mùvwabi, ne: “Yèyè ùvwa mufwànyine kupelula dibwe,” mùshindù ùvwa bintu ebi. “Kaa, Éyi Wèwè, nsokòkèku mu lukita, ne ùndamèku mu mwaba musokome.” Kutùngunukayè ne kukolesha. Yèyè ne: “Mvw’a kujingaku kwikala mumanye. Mvw’a kujingaku kwikala mumanye ne mpenyi pâmvwà mufwaànyine kuya, kùdi Muntu udi mufwànyine kuntentekela byanza, mèmè muntu wa mpèkaatù, ne Nzambi wa cijila, ne kwakula Nendè bwà bwalu bwànyì.” Kaa, ekèlekèle! “N’Yèyè Wàwa. Ndi mumanyè ne Ùdi Mwaba wàwa. Kùdi Muntu Kampànda Mwaba wàwa udi mwà kwenza nàнку awu. Kùdi Muntu mwaba kampànda. Ndi mwà kupeta Muntu awu penyi? Ndi mwà kupeta penyi? Nènkookolè ku ciibi Cyèndè bwà kuyiikila Nendè. Bu Muntu mwà kuntentekela cyanza Cyèndè pambidi, ne pàà Nzambi, ne—ne kungeelela cilamba mu njila wanyì, kuyiikila! Bu mèmè ànu mwà kupeta mwinè Muntu awu’s wè! Kaa, Yèyè awu ùdi penyi?”

<sup>167</sup> Wàkakenketa mu èkèleeziyà wendè. Ùkaavwa mukenkète mu bulongolodi bwèndè. Kàvwakù mwà kupeta Muntu wa mùshindù awu to.

<sup>168</sup> Ki dyàkàmwè, mavuba kudisàka paanyimà, ne kumònaye Muntu awu wènda ùlwa. Kaa! Mwoyi wèndè wà kale awu wùvwa wùtuuta ne disànkà. Pashiishe cintu kampànda kwenzekaci. “Ndi mumanyè ne Mupikudi wanyì ùdi ne mwoyi. Ki Muntu wa mùshindù awu nyèyè awu.” Amen. Kùcidi ànu Muntu wa mùshindù awu. “Ndi mumanyè ne Mupikudi wanyì ùdi ne mwoyi. Ne nànsha byòbì ne, paanyimà pàà misàndà yà mu dikòbà mimanè kubutula mubidi ewu, nànsha nàнку mu mubidi wanyì nèmmonè Nzambi, Yèyè ùngààdimwènà mèmè ne ànyì àbidi. Yèyè neimanè pa buloba mu ditùkù dyà ndekeelu.”

<sup>169</sup> Mu dindà dyà Paasàkà adi, pààkabiikàYe ku lufù kuntu kwàka, ne mubidi wà Yobò kawùciyi kàbidi cintu to ànu nkutu wa butù nàka, ùvwa mwindile. Yèyè ùvwa wa mu Kasùmbù kasungula aku. Yèyè wàkabiika mu lukità ne kubwela mu cimenga, ne Abraham, Izàkà, Yakòbò, Yobò. Kaa, ekèlekèle! Amen. Bwalu, bàvwa bindile Muntu wa mùshindù awu.

<sup>170</sup> “Ne kùdi aba bàdi bindile Kilistò bwà musangu mwibìdi,” bàdi mwà kucimuna bintu byà pa buloba, ku ngàsà Wendè, bwà kubwela munda Mwèndè, ne kukànga mèsù ènù ku cintu cikwàbò kanà cyònsò pa kuumusha Yèyè ne Dìyi Dyèndè: “Yèyè neàmwenekè bwà musangu mwibìdi mu Butùmbi.”

“Bwalu mpungi wa Nzambi neàdilè, bafwè mu Kilistò nebàbiikè; aba bàdi ne mwoyi ne bashààle nebàshintulukè, mu katancì kakesè, mu mubùnyì wà dísù, bàngaciibwa muulu pàmwè, bwà kutuutakeena Nendè mu mpeepèlè.”

171 Nànsha mémè mushààle nkutu wa butù, anyi ní ngíkala ne mwoyi pààlwàYe, bwànyì mémè kabyèna ne cidibi bishintulula nànsha. Amen. Kabyèna ne bwalu to, bwalu ndi mubàkùle cìkèèná-kumòna. Cibwikilu ncidisàke paanyimà, ne ndi muMumòne. Ewu udi mufwànyine kwimana, ne kuntentekela cyanza Cyèndè pambidi, muntu wa mpèkaatù, ne pa Nzambi wa cijila. Ne Yèyè ùdi mulàmbù wànyì wà kujimija naawù mpèkaatù. Yèyè udi Dìyì dìndì ntwà nyama ku mikòlò. “Ku cibangidilu kwàkadi Dìyì.” Yèyè ke Dìyì adi, ne Yèyè ùdi ùndeeja mémè, Kwaka. Amen. Nènku nèncyàmbè ne mbilà mikolè, pàncidiku ànu mpuyakana ne: “Yèyè ùdi Dibìikà dyànyì dyà ku lufù ne Mwoyi wànyì.” Ne myaba mikwàbò yònsò nduntekà. Myaba mikwàbò yònsò nduntekà.

172 Bu mwàkawkwàtàYe aba bàvwà bindile cyòci aci, ke mwàlwàYe kàbidì kùdì munsantu yònsò wa mu Dipungila Dipyadìpyà udi mucìmùne kadyuwu kwònsò kàà cyena dīgumba, ukàadikù mucìmùne mpèkaatù yònsò yà bìdì bantu banange ditùkù edi, yà cikondo citùdimu ne mwoyi mpindyewu eci, ànu mwàkenzaYe mu bikondo bikwàbò byònsò byà èkèleeziyà amu, aba bàdì baciìmùne mu cikondo cyà èkèleeziyà aci abu. Aba bàdì baciìmùne cinyi? “Ndi mubanji. Ncyèna nkèngela cintu nànsha cimwè to. Ndi ne. . . Kaa, ndi byònsò *ebi* ne byònsò *ebi*. Ne mémè ndi Mukàji-musèla. Ndi *cikampànda*. Ncyèna nkèngela cintu nànsha cimwè to.’ Kàdi kwèna mumanye ne wèwè udi butaka, mpofo to.”

173 Nudi numòna cikondo cyà diseeswishangana cìmvwà mwàmbè aci anyi? Kí mbifwànàngàne ne aba bàvwàbò bakòse mitù, kale wàwa, bwà kupeta dibwe ditòoke to; kí ngaba bààkafwila diitaba, ne kwoshiibwa pa byoshelu byà bikunyi binène, ne bintu byà mùshindù awu to; bààkapetà cifulu cyà butùmbi. Kàdi’s ncikondo cyà disseswishangana eci mpindyewu, cidibo bèèla meeji ne bàdi bintu byònsò. “Èè, mémè’s ndi cidimba cyà èkèleeziyà. Mémè’s ndi muntu mulùme mwìmpè. Mémè ndi muntu mukàji mwìmpè. Ntu ngenza *cikampànda*. Kabyèna bìkèngela bwà mémè kwenza *Cikansanga* to.”

174 “Kàdi ewu wàcìmuna,” ewu udi ucìmuna bintu byònsò byà pa buloba byà cikondo eci awu, cyenzàbo ncinyi? Bwònsò nebàsombè Nendè mu nkwasà Wendè wa butùmbi; nebàye mu Dyambwibwa pààlwàYe. Kaa, ekèlekèle! Cìngààditàcishilà ncinyi, dībà adi? Ncinyi citùdì mwà kukèngela bwà kuditàcishila bwà cidi bàà pa buloba bàmba? Ncinyi citùdì mwà kukèngela bwà kuditàcishila bwà cidi muntu mikwàbò kanà yònsò ewu wàmba? Nyumà Mwìmpè munène awu ùdi munkaci mwètù. Dikunji Dyèndè dyà Kapyà didi ditùlombola ne ditùludika. Dìyì Dyèndè ndishindikìibwe kumpalà kwètù. Dinanga Dyèndè didi mu mwoyi wètù. Maalu à pa buloba àdi paanyimà. Tudi buumùke ku lufù bayè ku Mwoyi. Bàà pa buloba bàdi bèèla meeji ne wèwè udi mupàle.

Kàdi Yesù ùdi ne cyà kwambula nkùrusè ewu  
nkààyendè,  
Ne bàà pa buloba bwónsò bènda bàkùpa  
mabòkò anyi?  
Kùdi nkùrusè bwà muntu ne muntu,  
Ne kùdi nkùrusè bwànyì mèmè.

<sup>175</sup> Bidimu makumi àsàtù ne bìsàtù mu budimi bwà bwambi,  
nènkù nengàmbulè nkùrusè mulàmbula ewu too ne pààlwà lufù  
kunsùùlula.

<sup>176</sup> Bàna bèètù bàmbènge, bàmbè cyónsò cidìbo baswè kwamba  
aci, nànsha bóbò bambènga. Kàdi ndi mwimàne pa Dìyì *edi*, ne  
Edi nkààyaadi.

Nèngàmbule nkùrusè mulàmbula ewu,  
Too ne pàànsùùlula lufù,  
Ne pashiishe nèngàalukilè Kumbèlu, mu  
Dyambwibwa, bwà kuvwàla cifulu cyà  
butùmbi.

<sup>177</sup> Ki citùdi twètù bwónsò baswè, kí mmwómò anyi? Ki citùdi  
baswè ncyòci aci. Ki dyètù—ki dyètù ditèkemena ne ditèndakana.  
Katwèna ne makwàbò meeji to, ànu àdi pa Yesù Kilistò awu.  
Ne pa bwakànè Bwèndè, nkààyaàpù, mpatùdi biimàne, ne  
bwakànè Bwèndè mu Dìyì Dyèndè. “Ne Dìyì dyàkavwijiibwa  
mubidi ne dyàkasòmbela munkaci mwètù.” Ne Dìyì dicìdi ànu  
dìDishindika.

<sup>178</sup> Kucìmuna munyì? Pa kwangata kwà Dìyì, mulayì, mu  
kudipwekesha kwónsò, kwenda badipwekeshè.

Nèngàmbule nkùrusè mulàmbula ewu,  
Too ne pàànsùùlula lufù,  
Pashiishe ngàalukilè Kumbèlu, bwà kuvwàla  
cifulu cyà butùmbi.

<sup>179</sup> Bwalu: “Pàdi Mpungi awu ùdila’s!” Nudi mwà kunjjiika mu  
mbù, kàdi Mpungi awu neàmbiishè. Cyà bushùwà. Dìdipu edi,  
nèngàalukilè Kumbèlu. Amen. Too ne dībà adi, nèntungunukè  
ne kulwangana, amen, kacya ànu mwambule nkùrusè ewu;  
mujooje mèsù àanyì kí mpa bantu to, kàdi ku Kàlvariyò kwàka,  
bwalu Yèyè wàkadi cileejilu cyànyì. Yèyè wàkaleeja mùshindù  
wà dicyènza. Ne cileejilu Cyèndè, netùcìlondè ne disànkà dyónsò,  
ku ditùkù ne ku ditùkù.

Ndi ngènda ndonda Yesù ku cidya cyónsò cyà  
njila.  
Ndi ngènda ndonda Yesù ku cidya cyónsò cyà  
njila.

<sup>180</sup> Kanwènaayikù banangè aci anyi? Kaa, mùshindù mwine  
wùndi mèmè ngèela meeji ne, kuMulonda, ku ditùkù ne ku  
ditùkù, ku cidya cyónsò cyà njila.

Tùsambilàayi.

<sup>181</sup> Mukalenge Yesù, dìbà òmòwè ne tusunsa dikùmi ne tùtaanu mpindyewu, mwimàne kaaba aka, nteeta bwà kwangata Dìyì Dyèbè bwà kuumvwija bantu mùshindù wà kucìmuna. Wèwè kutwàmbila mùdìbi byenzèka. Kwèna ànu mutwàmbile cyanààna to, kàdi Udi mutùleeje mwàkenzekàbi. Wèwè kutùlombola. Wèwè kutùleeja mwà kucyènza: nkwakidila Dìyì munda mwètù, ne kwikala batwìshìibwe bwà kushààla bakwàte ku Dìyì adi ne: “Bàakafùnda ne,” mu diteeciibwa dyònsò; kàdi kwikala badìpwekèshe, kwenda mu didìpwekesha. Dìbà adi tudi bacìmùne, ku Wèwè, ku bukolè Bwèbè bùkaavwà bumanè kucìmuna mwena lukunà wetù abu. Nènku cintu cìmwèpèlè citùdì ne cyà kwenza ng’ànù—ng’ànù kwenda badìpwekèshe ne diitabuuja, biikàle twitabuuja Aci, ne citàdi cyètù cyà dimanyishiibwa cyà Nyumà Mwìmpè, apu Sàtaanà ùdi ne cyà kushiya kaaba.

<sup>182</sup> Nyèwù kùdi mìshwalà mitèèka kaaba aka. Yidi yìleeja babèèdi. Bàdi mu lukèngelu, Mukalenge. Nènku mbabalè mu Dìyì didi kadiyì mwà kupangila edi mùvwàbo bàngata pambidi pàà Pòlò Munsantu mìshwalà ne tululù. Bàvwa bàyitènteka pa babèèdi. Nyumà mibi yivwa yipàtuka munda mwàbò, ne bishimà binène bìvwa byènjiibwa. Mpindyewu, Wèwè udi Mukalenge Yesù umweumwe awu leelù.

<sup>183</sup> Pòlò wàkayiisha Dìyì edi, ne wàkafùnda Dìyì edi, Dìyì òmòwè òmòwè dītùdì tuteeta kulonda adi. Bwalu, yèyè wàkangata Dipungila Dikùlukulu ne kudìtentula, ne kuleeja ne cìvwa ncìmfwànyì, cyà ne Dipungila Dikùlukulu dyònsò òvwa cìmfwànyì cìpwàngànè cyà Dìpyadìpyà. Éyì Mukalenge, swàkù bwà tùlonde cìleejilu aci.

<sup>184</sup> Tudi tumòna Mukalenge wetù, cyàkenzàYe. Ne tudi bamanyè ne, bansantu bàà Dipungila Dikùlukulu abu, mu dindà emu, tudi tusangana ne bàakamana kuya. Pàakabiikà Yesù, bàakaya Nèndè. Nènku, Mukalenge, tudi twitabuuja ne netùye pèèlàYe Mpungi apu. Tudi tucìtabuuja, ne Mukàji-musèla neàpàtuke mu Dìtùkù adi ne neàdisange ne kasùmbù kàà—kàà Cyòci aci kàà beena Ebèlù, ne, bwònsò pàmwè, nekwikalè Dìdyà dyà Dìbanjì mu Butùmbi. Abu mbindile.

Tudi tulòmba mpindyewu luse Lwèbè ne ngàsà pambidi pèètù. Bacìmunyi, Mukalenge, bacìmunyi, tudi tujinga kwikala nànkù. Bacìmunyi. Mukalenge Yesù, Wèwè wàkacìmuna buloba. Mpindyewu ndi ndòmba bwà Ùlekelè muntu yònsò udi kaaba aka, mu dindà emu bwà: “Kutèèka dìnà mpèkaatù yònsò ku luseke, kutèèka ku luseke bujitu bùdì butùjìngìle bipeepèle nùnkù abu, bwà twamòna mwà kunyeema ne lutùulù lubilu lùdì lutèèka kumpàlà kwètù.”

<sup>185</sup> Pòlò ngudi mwambe cyòci eci, Taatù wetù wa mu Dyulu, lwà mu Mukàndà wà Ebèlù mwàmwa, ne: “Bìvwa bìkèngela twètù kutèèka bujitu bwònsò ku luseke,” nshapitá

wa 12 awu, yéyè ngudi mwâmbè cyôci eci, paanyimà pàà yéyè mumanè kuleejibwa ku cileejilu, kale wàwa: aba bààkatungunukà; aba bàvwà kabàyi batungùnùke abu; aba bààkalonda ne civùmùvù abu; aba bààkalondela kumpàla abu; aba bààkajàngulukaka paanyimà abu. Byònsò, wàkaleeja bilejilu. Pashìishe kukùdimukayè e kwamba ne: “Tùteekàayi ku luseke bujitu bwònsò, kantu kakesè kwònsò kàdi katùnyùngùlùkile aku, bwà twamòna mwà kunyeema ne lutùlùlù lubilu lùdi lutèeka kumpàla kwètù; batàngidile kùdiYe, Mubangi ne Mujikiji wa Diitabuuja dyètù, Yéyè wàkatùpèèsha cileejilu awu.” Tudi twenza nànkù mu dindà emu, Taatù.

<sup>186</sup> Mpindyewu, ne mitù yètù miinyika, mpindyewu kenkètaayi ne ntèmà yònsò, ne ntèmà yònsò, menemene. Nènku, pashìishe, ikàlaayi ne meeji matòòke à menemene. Bìdi ànu—bìdi bikèngela ànu. . . Ki cyònsò cidi cikèngela: didikenketa dyèbè ne meeji matòòke ebe awu. Dimukàayi bikolè menemene panùdi nudikenketa mpindyewu apu. “Nkenkètèku, Mukalenge. Nteetèku. Kùdikù bubì munda mwànyi anyi? Bwòbòmù, Mukalenge, lekèlaku mbùtèèke paanshi, ànu mwab’ewu mpindyewu. Kaaba aka, pàndi mwinyike mutù wànyi apa, ke cyoshelu Cyèbè’s. Ndi mbùtèèka paanshi, ànu kaaba mpindyewu, mutentèke makàsà àanyipu. Pangùumuka, nebùshààle mwaba awu. Bukolè bwà Mashi Èbè nebumwòshe. Ndi muswè kwikala mucìmunyi. Ndi ne cintu kampànda cidi cintàcisha, Mukalenge. Ndi muswè kucimuna, mu dindà emu. Ndi mwà kucimuna, ku Wèwè. Mbandondèle bwalu abu, ku Dìyi Dyèbè. Ndi mbùtèèka paanshi mpindyewu, Mukalenge, ne ndi ndyatapù makàsà àanyi. Pàndi mpàtuka mu nzùbu ewu mu dindà emu apa, nya, bwà kumanya ne ncitèeka mu—mu cipànza cyà bwanga butòokeshi bwà Nzambì. Kabwàdyàkuvùlukiibwa kàbìdi to. Mpindyewu nèncitondè ne kulomba luse.”

<sup>187</sup> Ne mitù yètù miinyika, mèsù ètù mabwita; myoyi yètù yèla meeji, ki ciibi cyà musùukà ncyôci aci, nudi bamanyè’s. Kùdikù cintu kampànda cyùdi muswè kutèeka ku luseke mu dindà emu, cintu kampànda cyùdi muswè kucimuna anyi? Ne wèwè ukàadi muciteetè bikolè be, kàdi, mu dindà emu, neulekelè ànu diteeta. Newìkalè ànu mwà kwitaba cyàkenzàYe aci. Ndi muswè wèlè ànu cyanza cyèbè muulu cyanààna, wamba ne: “Mukalenge, ndi muswè kucimuna. Cintu kampànda cidi cintàcisha.”

<sup>188</sup> Mukalenge Yesù, Wèwè udi mumòne byanza abi. Mpindyewu, mèmè bu musadidi Webè, mwimàne pankaci pàà bàà mwoyi ne bafwè, ndi mpiisha byònsò bìdi bitàcisha bantu aba ne mèmè mwinè. Nènku ndi ndòmba nùnkù mu Dìna dyà Yesù Kilistò, tudi mwà kucishiya pa cyoshelu cyà Nzambì apa, ne kukwata njila kuya mu dindà emu, badishikàmine, bu bacìmunyi.

<sup>189</sup> Bàna bèètù bàà bakàji ní kabàvwa bapetè ngàsà kwònsò eku to, swàkù bwà àfidiibwèku mpindyewu, Mukalenge. Bàna bèètù bàà balùme ní kí mbapetè ngàsà to, swàkù bwà

àfidiibwèku mpindyewu. Nènku swákù, mu didipwekesha, maamù pàmwè ne bânà bèndè, pamutu pàà kwikala ne dyambu. Yèyè mmumanyè ne mmusòmbe. . . Yèyè's mmuyiishi wa bânà bakesè abu. Nsòmbelu wendè awu's ncileejilu. Papa ùdi cileejilu kùdi maamù, bwalu yèyè ke mfùmù wa nzùbu. Maamù ùvwa ùteeta bwà kumukòokeshà; kàadyàkucyenzakù kàbìdi nànsha. Pìikalàbi ne taatù ùvwa umwangata bu cikòlopà, kabyàkwenzeka kàbìdi nànsha. Yèyè mmumukwàcishi. Enzàku nànkù, Mukalenge. Swákù bwà bintu byònsò bìdi bitùpangishà ebi, Mukalenge, byùmushiibwè.

<sup>190</sup> Tudi—tudi tudilàmbula twètù biinè, Taatù, bwà cikondo cyà mwoyi citùdi naaci kumpàlà kwètù eku eci, bamanyè eci ne, netùfikè ku ndekeelu waci, ne ciine aci katààtaaka. Pa nànkù, mu dindà emu, tudi tubwelela mu mpungà ewu, paanyimà pàà Diiyiisha edì. Tudi tubwelela mu mpungà ewu, Mukalenge, bwà kulwa, bwalu tudi babiikidiibwe bwà kulwa. “Mwimikilè ntàtù yèbè, bwalu Yèyè ùdi ùkucyùka.” Ndi mumanyè ne Wèwè udi ucyùka, Mukalenge. Wèwè wàkatamba kucyùka too ne ku ditufwila. Ne ncyà bushuwà ne tudi mwà kucyùka bwà kulwa ne kwitaba ciWàkafwilà aci.

<sup>191</sup> Tùjidilèku, Mukalenge. Tùjèku cyàkàbìdi ne Nyumà Mwîmpè. Swákù bwà Nyumà Mwîmpè àkòokeshè ànu mu myoyi yètù, mu mùshindù mutùmbùke, bwà twàmòna mwà kwenda, tupwa mwoyi bintu byà kale, bitoci ne bukooyà mutwàkadi kale basòmbele amu. Netùkoleshè batàngile ku kiipàcilà kàà dibiikila ditùmbùke, mùdi Makènkè ètù mwà kutàmba kukenkesha mu kalolo ne didipwekesha, mu mùshindù wà ne mucipi wa ne njila yònsò ewu wàmòna mwà kwamba ne: “Kùdi mwena Kilistò kampànda musòmbele ku kakùnà kwàka. Muntu awu, mukàji awu, mulùme awu, yèyè's ncilòngò cilelèlà cijidila cyà Nzambi. Ùdi ne kalolo kààbúngì ne wa musàngèelu wà dikèmà, mwikàle misangu yònsò ànu wa dinanga ne mupòle, ne ùumvwa.” Enzàku nànkù, Taatù. Twikaleku batwè mukelè, bwà bàà pa buloba bààmòna mwà kupeta nyòòtà; enzàku nànkù, Taatù; ne kucimuna bintu byà pa buloba ebu, ne ntàtù yà mwoyi ewu. Mu Dìnà dyà Yesù Kilistò. Amen.

Ndi mwà. . .

Mpindyewu twèlàayi ànu cyanza cyètù muulu cyanàànà.

. . . Musùngidi. . .

Ùbiikila cinyi? “Pàtukà, mu bitoci.” Mwoyi wà mutàmbe kutùmbuka; Cintu kampànda cidi munda mwèbè amu, cikukòka mùshindù awu. Ncinyi aci? N'Yèyè's. Mu bitoci amu, tuubilòngò tukesè; nudi ne Mwoyi muntwamu, ùdi munkaci mwà kunùsàka. Ki cidi cikubiikila ne: “Pàtukàaku, mu bitoci.”

“ . . . londà, londà. . . ”

<sup>192</sup> Mpindyewu, udi wambilamù anyi? Mpindyewu bwitàayi kwìsù kwènù.

KwandombolàYe aku ke kungààlondà,

Mpindyewu dilekèlèlè wêwè mwine. Ambilàmu nàнку, mpindyewu.

KwandombolàYe aku ke kungààlondà,

KwandombolàYe aku ke kungààlondà,

Nènye Nendè, pàmwè Nendè, njila mujimà.

KwandombolàYe mémè. . .

Ànu ne kalolo mpindyewu. Wavùluka, dyadijè wêwè mwine mwaba awu's.

. . .kwàlombolàYe. . .

“Nèncitèèkè kaaba aka, Mukalenge. NènKulondè, kubangila ku mpindyewu. Ndi nCiitaba. Ndi nCiitabuuja.”

KwalombolàYe aku. . .

Wavùluka ne, nsòmbelu webè neàjaadike ne lubilà lukolè kutàmba mukana mwèbè. Nsòmbelu webè neàjaadikile bantu kutàmba byùdi wamba.

Ndààku Nendè, pàmwè Nendè, (Njila. . .

Penyi?) njila mujimà.

<sup>193</sup> Dilàmbùle ànu cyanàànà, mu ndòndò, ne meeji matòòke wònsò, ne mwoyi wèbè wònsò. Ambàbi túng bu ne eci cìwva mmusangu wà ndekeelu ùdi mufwànyine kwanyishiibwa bwà kusambila? Mbifwànyine kwikala nàнку. Ncyèna ntèkemena ne bìdi nàнку to. Bìdi mwà kwikala nàнку. Dìbà adi, ikàla mutwishiibwe mpindyewu, mutwishiibwe cyà bushùwà, mutwishiibwe bushùwà. Vùlukàayi ne, ciibi necikàngiibwè, dǐngà ditùkù, dìbà adi nekwikale kumanè kujika kwònsò nkòong. “Lòmbaayi, nenùpetè.”

<sup>194</sup> Anji elànganaayibi ànu meeji ku butùmbi bwònsò bùdiYe mukupèeshe abu, byònsò bìdiYe mwenze. “Ndi ngiitabuuja, Mukalenge. Ndi ngiitabuuja. Ndi ngiitabuuja ne Wèwè udi mucimunyi wanyi. Ndi ànu ngenda Neebè, Mukalenge. Ndi muswè kushààla pabwìpi Neebè menemene, bwà ne kwònsò kŪdì, ke kùndi muswè kwikala.”

<sup>195</sup> Nèнку vùlukàaku ne, Wèwè utu mutwàmbile, Taatù, ne: “Netwikalè ne Mukalenge kashidi, patwàngaciibwa muulu.” Tudi ànu ne—ne didyànjlà kumòna Dyèndè mpindyewu, pàdiYe wènda neetù mpindyewu apa. Kàdi dìbà adi netwikalè. . . Cintu cinène kaayipu's wè, ànu bwà kumanya ne Yèyè ùdi munkaci mwètù—mwètù! Nebiikalè cinyi patwikalà Nendè bwà kashidi? Tudi banange bikolè midimu yetù yònsò: tudi mwà kupatuka twend twendakana mu màshinyi; tudi mwà kuya kasumba bintu; tudi mwà kuya kalemba, kuya kalòba, anyi cyònsò citùdi bafwànyine kwenza mu bisankasanka aci. Kàdi, kaa, pàdi èkèleeziyà ùkanguka, tudi baswè katwilangana ne Mukalenge wetù. Aci's nciitambe bunène ku bintu byònsò. Dìbà



adi, elàbi meeji, Yéyè ngudi mutùlayè. “Ne bwà kashidi kwikala ne Mukalenge. Kusòmba Nendè mu nkwaswa Wendè wa butùmbi, ne kwikala Nendè bwà kashidi.” Éyì Nzambì, ne kudìpwekesha kwònsò, ne—ne mitù miinyika, twètù tudi tucìitaba, Mukalenge, mu Dìnà dyà Yesù Kilistò.

<sup>196</sup> Nudiku nuumvwa ne nudi mwà kushiya ànu, mpindyewu, bintu byònsò, bujitu bwònsò anyi? Nudi mwà kwendela kuulu, kumutù kwàbì mpindyewu anyi? Wèwè muumvwe nànkù, elà cyanza muulu, wàmbé ne: “Ku ngàsà wa Nzambì ndi ntèeka diteeta edi paanshì. Ncyàkudilwishakù to, kàbìdì. Nènkwatè ànu ku cyanza Cyèndè, kwasa lwendu.”

“Ngálwangànyì mvità, Mwanèètù Branham. Ndi muteetè kulekela kunwà mfwankà. Ndi—ndi muteetè kulekela nsukì yànyì yileepa. Ndi muditàcishe bwà kwenza *cikampànda*. Ndi mwenze... Nkaadi muteetètètè, bikolè be, Mwanèètù Branham. Ncyèna ànu mwà kucyènta to.”

Kùcìteecikù, kàbìdì to. Kwàta wèwè ànu ku cyanza Cyèndè, wamba ne: “Taatu, Wèwè mbwejèku cyanza cyànyì mu dibòkò dyà mutèèlu.” Nwamònu anyi? “Mémè nènKupèèshè ànu cyanza cyànyì. Nèntungunukè ne kwenda, Mukalenge, kacya mutàngìle ànu Kùdì.” Ncyènzeke. Neàkuvwàdike bu mwena Kilistò mulelèlè. Newikale mwena Kilistò mulelèlè.

<sup>197</sup> Too ne pàngàànùmònà, dilòòlò edi, Nzambì mmunùnangè ne ikàlèku neenù. Nudi bàna bàanyì bàà Èvànjeeliyò. Nudi bàdi basùmbìbwe.

Mpindyewu ndi nnùpèèsha mpaasàtà wenù, nnwàlujilaye, bwà ditangalajangana, Mwanèètù Neville...?...



63-0825M Mmunyi Mûndi Mwà Kucimuna?  
Branham Tabernacle  
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)